

四庫全書

史部

欽定四庫全書

史部
湖廣通志卷七十四

詳校官監察御史臣陳化龍

檢討臣德生覆勘

總校官知縣臣繆琪

校對官學正臣常循

謄錄監生臣鄧以伊

欽定四庫全書

湖廣通志卷七十四

仙釋志

方技附

朱子於二氏之書皆能晰其原委直探其間奧然
後折之於道以明始之近是末流之滋惑又嘗謂
學佛者勤猛精進吾徒有不如而註參同契著調
息箴則以衛生之經未可厚非也今志仙釋攷諸
記傳參以二氏之書備著楚地所有焉古稱一藝

足以成名雖無關於經術而及其至也精深微妙
藝也進乎道技也通乎神矣醫卜之類利賴民生
由來久矣因加採擇以永其傳

武昌府

三國介象神仙傳字元則會稽人有諸方術吳主聞
之徵到武昌甚敬貴之稱為介君為起宅給以御帳
賜遺前後累千金從象學蔽形之術試還後宮及出
殿門莫有見者又使象作變化種瓜菜百果皆立生

可食於殿庭中作方塼汲水滿之垂綸於塼中須臾
得鯔魚乃使厨下切之為鱠吳主恨無蜀薑象書符
使行人閉目騎杖杖止買薑復閉目騎杖須臾已還
厨下切鱠方畢

唐羅思遠唐書列傳思遠鄂州人能自隱明皇欲學
之不肯盡其術試自隱常餘衣帶及共試則驗厚賜
金帛然卒不得帝怒裹以幘壓殺之數日有中使者
自蜀還逢思遠駕而西笑曰上為戲何虐也以蜀當

歸寄獻遂失所在天寶末年帝幸蜀亂平回鑾始悟
蜀當歸之寄云

劉元靖明一統志武昌人初師王道宗道宗仙去靖
遂遊名山入南嶽鑿石穴以居絕粒鍊氣唐敬宗召
入思政殿問長生術尋放歸武宗復召入禁中受法
錄賜號廣成宣宗時仙去惟杖履在焉

劉本德明一統志鄂州人好古多藝商販於江湖乾
符中歲大饑散米數萬石賑之黃巢亂避地五老峯

下有鹿裘道人來訪把臂入深澗忽一老人邀入山
院丹碧輝煌老人曰此洞天也以汝行善故許至語
畢不見道人曰汝得名仙錄矣後徧遊名山竟仙去
宋章自然武寧人闕觀於興國太平觀以玉帝靈符
濟人贈通真至妙靈應自然廣惠真君賜金鐘玉磬
封其父母至今仙蛻猶存

舊通志

元張紹思嘉魚靜保寺僧辟穀數年出入乘白馬無
轡隨一黑犬自甃石塔於寺後入塔端坐而逝

舊通志

志

明黃中理寧州人庭堅八世孫弱冠廕光州固始尉
患痿痺棄官歸有神師金花君者謂之曰吾療而疾
愈當為道士中理許之七日能起行乃去學老子法
於欽天瑞慶宮宮在興國九宮山即張真君道清鍊
丹之所太祖西平江漢中理拜於鄂應對稱旨召至
京命禮部宴之賜玉壚襲衣還山年七十餘卒

舊通

志

簡中陽字致

關

武昌人放浪湖海遇異人授以中黃

上道清微秘法洪武中入武當辟穀隱居紫霄峯

釋勝學號無念姓陳氏應山人幼不識字往參荊州

無聞和尚豁然有悟偈云數載東山昏霧濛凭闌終

日待晴空夜來忽睹霜天月萬物全彰一鏡中洪武

中楚昭王迎至洪山尋遷九峯奏聞召見優賜還山

雪庵和尚靖難後遊跡至武黃間托堪輿以自晦所

扞葬多奇中按何景明云雪庵好讀楚詞時時買楚

詞袖之登小舟急棹灘中流朗誦一葉輒投一葉於水投已輒哭哭未已又讀讀終卷乃已衆莫測其云何

黃鎮武昌人少為繼母所窘逃出遇異人於武夷山授法召天神立至命移樹頃刻風雷交作樹果東西異位及歸值歲旱母命溉園因磨墨染符黑雲大雨不出園外為郡縣祈雨雨亦不出境一日母迫之忽自經於九曲亭舉棺人疑其輕啟視之惟一履存焉

劉邈，天門人，棄家遊於鄂，遇異人授以規中祕旨。逾歲歸省父母，於妻子不一問。復至鄂，益佯狂，拾糞穢間殘果敗瓜皮以食，又集破布敝屨以為衣。人以邈，過呼之初，寓鳳凰山五顯祠，食其神前大燭，盡守祠僧，嗔之，乃出卧山上。值大雪覆壓二三尺，僧恐凍死，持鋤掖而出之，則正酣睡也。人訪以禍福，或不對，或罵詈，然已隱寓吉凶。癸卯鄉試，蘄郡士謁之，卜取舍。邈過指郭士望曰：「好箇文質彬彬一人也。」聞中果。

此題而郭占解首其他多類此坐卧一磚榻三十年
值歲饑人多就求食啖以飯數粒即飽數日其子尋
之與以一常著衲令著歸所求無不如意若稍長節
之再著則生蟻蟲延走他服乃焚之蟻蟲盡化美珠
其子拾藏之則仍成灰燼後終於鄂越歲葬羅駕山
昇者輕如負斗米人皆知其尸解云

徐駭兒不知何許人口期期不能言聽其聲音似徐
駭兒者故名常卧於洪山四天王之足髮結身垢不

可近其所乞諸穢物懷而食之人咸憎惡不與言有
遠僧遇諸途膜拜於地徐駭兒不答去人問僧曰汝
何拜此僧曰我曾座下聽講是京師一大師也人
叩之終不言久之止一大樹下鼻垂兩白柱大如指
長二尺許而逝矣

曇晦海東羅國人母夢白龍駒負如意珠光感而生
師徧參諸國至中土悟臨濟宗開山於大冶三平等
山後坐逝全身歸塔

心如俗姓王黃安人苦修頓悟楚藩迎主修靜寺後
端坐而化鼻中玉柱雙垂異香四散

覺來嘉魚諸生博綜內典遂棄功名結庵方外負米
自炊不受人間一縷半粟習止觀修靜土心境洞然
坐化之日感應殊異

無相僧名如堂南陽人初住岳陽深山中持蓮華經
二十年後掛錫嘉魚之出泥庵忽一日語人曰予將
行因修懺事展留一月旦日酉時逝矣及旦趺坐大

呼曰去火光冉冉化作金蓮花而上

戒生浙江人明季至興國銀山寺開堂歲饑多所濟
給與人父言慈子言孝隨地開發未嘗勸人奉佛也
年七十端坐說偈而逝

天如不知何處僧住鄂城修靜寺言未來禍福不爽
常受一宰官舟資數兩渡江即畀舟子或曰何多也
師云彼曰舟資故與之又某施一衲值十五金遇寒
乞即以衣之張獻忠破省之前師指東門謂人曰此

竈竇也又曰城內皆圈猪張屠李屠至矣每五更沿街呼叫謝檀越佈施大難到盍早為計癸未元旦忽不見六月闔省及於難

以上舊通志

漢陽府

漢董仲孝感入明一統志董永之子生而靈異能使鬼京山潼泉地多毒蛇書符鎮之蛇絕岳州安鄉縣苦水書符石上立縣東南隅水不至有不信者掘地欲窮其趾愈掘愈深趾不可見水患如故

唐九真仙女九真山有九仙女飛昇石及煉丹井

舊

通志

駱僧嵩陽有駱禪師坐禪石傍有泉相傳師卓錫於

此有泉湧出

舊通志

明明徹不知何許人
洪武初掛錫興國寺為都綱寺
遭元末兵燹徹經理營構遂再盛
徹有識力通書義
嘗賦梅花詩三十首
老年退居陽臺一日徹恙具湯
沐更衣索筆書偈從容而逝

死和尚黃岡貢生袁中甫也因遭坎壈削髮於京師崇國寺蕭方伯丁泰王同知袵與為禪侶公安袁宏道兄弟招之作吳越遊已而歸愛大別山水遂卓錫焉於藏經閣後築室一區以養母

陳孝子江西人著麻衣孝服往來江漢間不知其名字但肩一畫像云其母形所到處即卜卦伺其母之喜怒喜則留不喜則去飲食笑啼皆在焉尤與漢上李太常宗魯善謂有夙因館於李嘗大書完養厚植

匾額贈李字大如箕至今存焉又善屬對熊石門督
學常出雲臺將名即以雲臺將對之逆對而上文從
字順如夙構萬厯中告李曰吾當解去已而玉柱雙
垂曰吾心頭若熱吾當返至期果返嘆曰大道之難
言如此遂瞑後七日李使遇之劉家隅以扇書七言
絕句附謝太常始知其尸解也

以上舊通志

皇清生生道人不知姓名或曰江漢間人行符水方藥
於咸寧蒲圻間多奇驗有孝廉郭翹中家一室東

邊地忽軟如泥不可下足屋瓦欲傾請於道人乃
置步植符而地復故順治初蒲圻周生見道人負
葫蘆行賣藥問之曰吾偶寓跡仙棗亭詰朝可相
訪次早登亭無所遇不知所之

楊鍊師字易生蒲圻人遊江漢間自言年已百歲
黃蘗白飯誨人以修身明道之學旋遊太和未幾
即返曰山中人具殺機不可與處於月湖中結茅
以居自是絕粒惟日啖泉水一勺久之端坐而逝

炎暑三日夜顏色猶有生氣

正義黃陂人參天童和尚以聞爆竹聲開悟機鋒

圓捷晚年歸楚開法席於素山尋坐化

以上舊通

志

黃州府

周釋寶掌指月錄中印度人威烈王十二年降神左

掌握拳七歲祝髮乃展因名寶掌魏晉間東遊此土

旋至五臺復南歷衡嶽舊通志載卓錫黃梅居雙峯

遂成叢社後過廬山抵白下邂逅達磨訪南海復返
雙峯自周威烈丁卯降生至唐高宗顯慶二年示寂
實一千七十二年故五燈會元稱千歲寶掌云

晉羅致福明一統志黃梅人修道於縣北鳳凰臺丹
成一日於簷下洗手水腥乃曰龍有病乎可瘳也明
晨有秀士以首疾謁福曰可示正形俟我北郊毋驚
人民尋往見一龍伏坎中斫其腦出白蜈蚣一傅以
丹丸龍徐徐騰去後名其地為乾龍池致福於元康

中冲舉

麻姑續文獻通考後趙石勒時麻胡秋女其父猛悍人畏之築城晝夜不止雞鳴乃息姑有恤民之心假作雞鳴羣雞皆應衆工乃止父覺欲撻之姑懼而逃入石洞修道後於城北石橋飛昇追者不及名其洞曰仙姑橋曰望仙

南北朝宋益字儒上明一統志宋益廟注青州人為番禺刺史棄官隱黃梅之黃齡洞有道術能役鬼神

救疾元嘉末邑大旱縣尹劉弼往洞禱求宋延入圍
碁數日辭歸市朝已易後人立祠祀之

菩提流支中印度人梁武時與達磨同來震旦示寂
於多雲山譯經藏為流支疏

舊通志

唐費郎君名光輝廣濟人母劉氏餉夫於田震電晝
晦有龍鬚之異自是體不平有異僧以三丸和墨汁
飲之三年而生郎君不喜乳喜嚙澗中水數歲與羣
兒戲水塾師詣河濱罵之忽雷雨中水起四顧大

霧遂失郎君所在越數日忽自來踞於庭曰吾龍也
三年將俱往至期果以父母去故居明水山側鄉人
於其地立廟祀之

三仙女何許陳三姓廣濟靈東鄉人結為姊妹入山
修真大中元年雷雨作仙樂隱隱雲霧中遙見三女
頃之莫知所之馬蹄履跡留山上人異之建祠山畔
有泉湧出旱則取水禱雨

張連翹黃梅縣女道士年八九歲持瓶汲水見井中

有蓮花如小盤漸出井口往取便縮不取又出如是數四遂墜井衆人怪久不還往視見連翹立井水中及出忽得笑疾頃之復云饑求食日食數斗每夜置瓶餉卧所覺即食之如是六七日乃聞食臭自爾不食歲時或進三數顆衆父母因命出家年十八晝日獨坐見天上雨錢及黃藥三丸遽起取之吞二丸便死頃之復醒覺力彊神清天寶末忽悲辭父母如有所適百姓縣官皆見五色雲擁一寶輿自天而下競

來觀視連翹初無所覺雲亦消散然自是兩脅相合
形體枯悴而無所食矣

以上舊通志

釋道信指月錄姓司馬氏世居河內後徙於蘄州廣
濟縣初禮三祖粲師求解脫師曰誰縛汝信曰無人
縛師曰何更求解脫乎遂大悟武德甲申歲師却返
蘄春住破額山太宗三詔不起後坐逝葬山畔廣德
間謚大醫禪師

弘忍指月錄黃梅人先為破額山中栽松道者嘗請

於四祖曰法可得聞乎祖曰汝已老脫有聞其能廣
化耶若再來吾尚可遲汝乃去行水邊見一女子浣
衣揖曰寄宿得否女曰我有父兄可往求之曰諾我
即敢行女首肯之遂回策而去女周氏季子也歸輒
孕父母大惡逐之已而生一子以為不祥因拋濁港
中明日見沂流而上氣體鮮明大驚遂舉之成童隨
母乞食里人呼為無姓兒後遇信大師得法坐化於
破額山壽七十有四示滅建塔於黃梅東山謚大滿

禪師

慧能新州人流移南海指月錄姓盧氏父行瑫母李氏三歲父喪鬻薪供母一日聞客誦金剛經至應無所住而生其心有所感悟乃來黃梅叅五祖忍大師便就舂米之役一日會衆傳法弟子神秀為偈書壁云身似菩提樹心如明鏡臺時時勤拂拭勿令惹塵埃能不識字聞之請人書曰菩提本無樹明鏡亦非臺本來無一物何處惹塵埃忍見之遂傳法為六祖

謚大鑒禪師

神秀開封人姓李氏舊唐傳燈錄神秀師事五祖弘忍弘忍深器異之謂其懸解圓照張說嘗問道執弟子之禮退謂人曰禪師威德巍巍王霸之器也

令珪蘄州三角山僧姓韓氏涿州人山多虎師住悉遁去因號為伏虎禪師

二梵西竺人隋唐間住蘄州之長流寺後移圓峯山頂建刹早禱輒應

道悟結茅於黃梅紫雲山即寶掌故址將新老寺有
老人前拜曰吾烏沙潭龍也冥罰當死請救之悟問
汝能易形乎曰能乃化小蟲伏襟帶間是夕雷雨大
作不能害明日老人拜曰非師幾腥此山矣請助工
水取之井米取之石如其言寺成遂止是為雲門禪
宗之祖

道初為五祖侍者有年住龍華寺機辯峻捷門人罔
知造詣一日謂衆曰昨日離城市白雲空往還松風

清耳目端的勝人間有頃脫然而逝

白崖蘄州高谿寺僧有人願從其教師曰汝凡胎也
引入山間剝滌五臟途人驚往視之尋覓弗獲惟見
一石齒刺山麓儼然白崖形其下有石刻詩云金殿
重重鈴動風有龍飛入碧雲中晚來落盡山前雨人
借僧房鶴借松

以上舊通志

宋劉仙女仙女父居黃梅縣東密峯之側女未笄父
出耕豫言陰晴宜持蓑與否皆驗後入山不知所在

土人祠之名仙女洞

舊通志

丐者趙生高安人敝衣蓬髮未嘗洗沐好飲酒醉輒毆罵市人一見即能道人宿疾與平生善否元豐中蘇子由謫筠忽來見語以養生養性之說自言生於周甲寅今百二十七自臍以上骨如龜殼心以下骨如鋒刃兩骨植其間不合如指久之求書往黃州謁東坡遂留半歲坡歸從行至興國為所畜駿騾跽死興國守楊繪具棺葬諸野元祐初二蘇還京有蜀僧

法震來言雲安酒家逢一丐者云姓趙在黃州識蘇
學士為我致聲問其狀良是時興國守朱彥博之子
在坐歸語其父亟發瘞視之惟一杖及兩脛骨耳

舊

通志

土主世傳宋西蜀人張姓行七稱張七相公明一統
志張相公廟注宋時麻城縣人張行七毀沿江淫祠
繫獄邑有火災釋而捍之跨烏騅執朱挺指火火滅
遂至縣西北五腦山人馬俱化後人建祠祀焉宋封

紫微侯明封助國順天王

師戒居蘄州五祖山春渚錄東坡前身為五祖戒和尚故坡嶺外詩云父老爭看烏角巾應緣曾現宰官身溪邊古路三叉口獨坐斜陽數過人又志林雲庵夢同子由及蜀僧聰透五祖戒既而三人夢皆同東坡書至云旦夕相見三人喜出城迎之

法演指月錄蘄州五祖法演禪師綿州郪氏子年三十五始棄家祝髮受具始謁圓照本禪師再謁浮山

遠禪師遠一日語師曰吾老矣恐虛度子光陰可往
依白雲與雲問答領悟獻偈雲特印可後命分座開
示方來崇寧三年入滅山摧石隕四十里內巖谷震
吼

明柳夫人其先蜀人大父秉忠父正皆仕元夫人生
而靈異韶年遇賊掠之不屈加刃無所傷賊驚愕昇
歸稍長好道及讖緯術歸龍氏子且有子矣大父謀
抗明兵夫人言天命有在不聽遂與壻敗死夫人為

俘洪武元年放還溯行江上晝夜波濤光怪隨舟至
陽邏虎頭磯止焉乃踞其巔績麻七日有老叟袖符
錄一卷授之曰明此役鬼神驅六丁矣是夕風雷拔
木鷲獸潛藏荆榛頓豁適鄧將軍愈討麻陽道陽邏
微服往見夫人曰將軍不與乎愈命將士試與角皆
禁不得發夫人知愈輕麻陽乃曰將軍無輕敵脫有
急吾當助之愈問其徵曰羣鴉作陣愈進討果失利
天忽晦冥羣鴉翔集見夫人緋衣躍馬空中霹靂山

震轉石揚沙愈乘之大勝麻陽遂平歸奏太祖賜封
妙真夫人後夫人欲建泰嶽祠而難其材值木筏蔽
江而下乃以一絲繫績具筏膠不行商乃輸木建祠

磯上後年九十解去

舊通志

萬福敦續文獻通考字玉山羅田人幼攻舉子業棄
去投塔山寺為僧名道璣善踵息修鍊不噉秣麩鹽
酪旁通風角堪輿奇門符水尤聖於醫繪蘭有清韻
其他譜琴擊劍蹴踘躑躅雜伎種種入能品語人禍

福多奇中人問以故曰太清無織雲誠則明矣遊霍山以青龍河有佳氣居之明年忽謂主人曰靈鶴夜至倘余假寐幸亟呼出戶也是夜風聲如驟瓦甍盡鳴主人舉炬視之則羣鶴集竹稍仆壓牆屋呼玉山不應入戶窺之正襟趺坐逝矣年九十二初以術授陶仲文能白晝招鶴謂曰行之可致富貴嘉靖間仲文膺殊寵詢其師贈玉山清微神霄演法真人

梅道人居蘄水竹瓦店農人也得異人術乃掘土室

可容膝坐卧其中五十餘年其子日以糜粥數甌餉
之子死孫繼之寢處置黃庭經一卷時時展視人叩
其道默而不言朱顏豐澤肌膚膩如脂土室外雪深
二三尺不冠而出徘徊冰凌中不寒年八十餘坐逝
即土室封之

舊通志

釋法幢姓李氏黃梅永福鄉人為四祖寺僧逝後有
廣濟安樂鄉余志玉家生子自言吾法幢也識舊物
不爽人呼再來僧仍居前寺永樂間召至京師賜居

報恩寺馬

香林正德間至黃梅住老寺之白雲洞洞有虎乳兒
香林叱之虎哮吼去趺坐洞中七日未火食人異之
靜鑑居黃梅妙高山歲種芋三百六十本日噉其一
攻苦精進慧鑑渾圓至今肉身存焉

無念名深有東山熊氏子少孤披剃徧遊諸方嘗參
一名宿值鋤瓜茄次師請開示宿即指曰黃瓜茄子
參四十年後忽有省原不識文字自是偈頌書札口

占如流晚年入黃栢山建禪林請益者輒罵諸方有
天童打黃栢罵之語

雲峯俗姓張蘄水人正德丙子年生少出家遊方六
十年歸里故人無一存者惟朱氏媪識之以正嘉事
叩之皆不曉但曰當時三公廟前止數家不如今之
多闐闐也明末壬申年化去壽一百一十七歲官奉
常為作壽僧傳

德心住三角山白雲庵不識字惟司炊爨拜觀音願

通文一日傾淨水處生蓮花一枝因閉關三年遂得
頓悟悉解諸經並博通文字言晴雨輒驗之蜀所居
寺後有大石數十丈欲崩勢屹屹壓瓦上師向石上
坐誦心經即合不復墜蜀人為開道場

撮米和尚栖羅田雲山洞中止食米一撮一趺坐
輒七日問休咎多驗臨化令其徒投骨水中不沉

上舊通志

皇清山鐸名真在德化縣李氏子出家悟道住黃梅四

祖寺復住浣川華桂寺預定化日期至端坐書偈
曰從無量劫來與衆生為伍將此皮骨送入江河
喂魚鼈鰕蟹濟衆生饑苦免占檀那地土浩浩長
波是吾歸所擲筆大喝一聲而逝

舊通志

戒顯太倉人順治間住黃梅四祖寺顯儒家子既
出家苦習頭陀行無書不讀開四祖萬工池得三
峯法至今人稱四祖顯云

舊通志

安陸府

晉葛洪晉書列傳字稚川句容人少好神仙藻養之
法從祖元吳時學道得仙以其煉丹祕術授弟子鄭
隱洪就隱學習得其法聞交趾出丹砂求為勾漏令
後止羅浮山煉丹優游著述所著內外篇凡一百一
十六篇年八十一卒顏色如生體亦柔軟世以為尸
解云舊通志載隱於當陽紫蓋山

南北朝張元始居荆門好黃老能隱形易貌年一百
十六告別所知而歿湘東王奇之留其枕

舊通志

唐司馬子微明一統志台州人煉丹於內方山丹成後人名其村曰馬仙村李太白集子微謂余有仙風道骨可與神遊八極之表乃著大鵬遇希有鳥賦以自廣

釋承皓指月錄荊州軍王泉僧依大力院出家後遊方叅北塔廣和尚發明心要得大自在三昧製犢鼻禪書歷代祖師名字曰惟有文殊普顯較些子且書於帶故叢林目為皓布禪示寂門人圍繞師笑曰吾

年八十一老死昇尸出兒郎齊著力一年三百六十
日言畢而逝

白乳廣明中住彌勒院戒行精專黃巢兵殘郢復二州
脇之不從巢怒欲殺之刃方加頸白乳涌出巢大驚
異後竟為亂兵所害人收其遺骸為浮圖葬之

舊通志

五代知節禪師開運中結廬荆門西山荆南高氏出
師攻伐道由荆門知節告以成敗悉驗師還乃伐藤
為牀以薦節每荷笠下山即雨嘗驅猛虎與之並遊

結廬潭上蛟龍避焉

舊通志

宋楊仙失其名宣政間道人嘗寄郢州朱司戶家數載落魄不羈狂飲自如朱不少厭一日酒酣曰我辭世矣無疾而逝葬山中後二載朱住京師忽見於道言笑如舊詰所以不言朱歸發墓視之乃空棺因創

塔於墓

舊通志

張道清明一統志郢州人熙寧間入九宮山修道光宗疾召治之以符水進輒愈修醮夕光景如晝賜號

真君寧宗書欽天瑞慶宮賜之

竟脫郢州林溪僧僧問如何是無縫塔師曰復州城
曰如何是塔中人曰龍興寺嘗卓錫於纂子山泉水

湧出

舊通志

明從鉉字又鉉一字鼎煒安陸人正統八年母夢湘
子入室而生骨相奇偉篤好黃老之術謝婚聘辭父
遊嵩華遇異人授大還藥丹成雲迹靡定萬厯庚寅
郡守阮屏麓自述昔遊太華偶失路遇鉉指引見道

貌軒舉問姓氏年已百六十歲矣後聞入華山絕巘

不知所終

舊通志

碧天自蜀入荆門四十餘年一日謂其徒曰吾當西
矣坐禪榻合掌跏趺火自內焚及胸尚誦佛號不已

須臾化去

舊通志

德安府

唐胡紫陽居隨州殮霞樓吸景煉氣與李白元丹邱
演數人高談混元金書玉訣白贊其身揭日月心飛

蓬萊特為訪之以求得其精術

舊通志

釋大用不知何許人元和七年行脚至安陸石佛山
跌坐其麓忽舉杖得前梁瓦如許藏土隙中因卓錫
焉示寂建塏於山之陽歲旱齋沐掃塏輒雨萬厯間
邑令高一迪過此強起視之尚緘目作笑容髮已垂
肩爪盤於膝高曰生耶刺之赤液徐出少焉四山雲
合風雷俱作高百拜悔罪封扃而去後好事者再為

啟視則枯矣

舊通志

宋唐風仙名守澄隨州人幼入武當姿貌清竒杖頭常掛葫蘆數十往來均房間郡守程進令開闢武當預道人吉凶多竒中常叱辱人被叱者即蒙福慶人以風仙稱之或立積雪或卧道路常有虎豹守衛後莫知所在

舊通志

元魯洞雲名大宥號洞雲子應山人幼入武當學道遍歷南北至元乙亥偕汪正常開復武當住紫霄南巖年八十餘以道著遠近點墨片紙可療異疾解化

之日顏面若童子

舊通志

王真人德安人修煉於零陵之元和山元初賜觀額
為萬壽宮封懿德真人徵入朝遂不復返

舊通志

明趙童洪武初乞食應城竟莫詳其年披鶉衣繫瓢
杖頭治病立愈雪天輒露坐去坐丈許無雪溽暑坐
卧赤日中身無汗垢日居應城不遠出而邑人多於
襄郢荆岳間數數見之江西張真人以舟迎去拜懇
長生術數月無一言加以刑童遽死令人瘞之昇棺

者覺其輕啟視之惟一竹杖存焉

舊通志

釋靈山名傳然潘姓家於安陸東郊為郡功曹一日
問法於禧公言下大悟遂祝髮跣足草庵中念佛不
置賊氛之變亦不避賊笑問曰如何成佛曰不殺人
不放火便是活佛賊聞斯言遂擲弓矢羅拜而去

舊

通志

荊州府

周韋震神仙傳號玉子南郡人少好學衆經周幽王

徵之不出乃嘆曰人生世間日失一日去生轉遠去
死轉近但貪富貴不知養性命盡氣絕雖位為王侯
金玉如山何益於灰土乎獨有神仙度世可以無窮
耳乃師長桑子具受衆術別著道書百餘篇後入崆
峒山合丹白日升天而去

南北朝老尼太清間宜都有老尼誦經於紫竹庵庵
臨溪側一日溪水暴漲老尼大笑擲蒲團於水中跌
坐其上誦普門品順流由漢陽江出清江而去莫知

所之後人因名為師姑溪

南嶽鄧先生名郁字彥達南史鄧嶽傳荊州建平人少而不仕隱居衡山極峻之嶺立小板屋兩間足不下山斷穀三十餘載惟以澗水服雲母屑日夜誦大洞經梁武帝敬信殊篤起五嶽樓貯之天監十四年忽見二青鳥悉如鶴大鼓翼鳴舞移晷方去謂弟子曰求之甚勞得之甚逸青鳥既來期會至矣少日無病而終武帝後令周捨為鄧元傳序其事

隋岑道願明一統志江陵人隋初避難沂三峽至萬州江南山巖下修煉食黃精百餘歲而逝唐貞觀十八年常屬香於商人令往所隱巖下爇之商人不往濤怒舟不能上乃返爇香波遂平

智者禪師指月錄諱智顛荊州華容人姓陳氏年十八喪二親於果願寺依僧法緒出家隋開皇十七年十一月二十四日趺坐而逝師始受禪教終乎滅度居天台二十二年建大道場一十二所國清最居其

後及荊州玉泉寺等共三十六所度僧一萬五千人
寫經一十五藏造金銅塑畫像八十萬尊事蹟甚廣
按神僧傳釋智顛字德安姓陳氏潁川人年十八投
湘州果願寺出家後於當陽縣玉泉山立精舍勅給
寺額名曰一音開皇十七年卒於天台山所載小異
未知孰是

慧安神僧傳姓衛氏枝江人大業中開通濟渠追集
夫丁饑殍相望師乞食救之存濟者衆指月錄嵩嶽

慧安國師得法黃梅徧歷名勝煬帝常徵師不起唐
高宗徵師亦不赴武后以師禮迎至輦下景龍中示
寂春秋一百二十八

唐鄧道士相傳居荊州紫霞觀丹成仙去爐旁遺丹

二粒鮑氏二婦吞之亦仙去宋政和間建觀

舊通志

廬山人酉陽雜俎荊州人寶曆中常販燒樸石灰往
來於泐南草市時微露奇迹賈人趙元卿從之遊言
事多奇驗人爭問之惡其煩遂避之復州元卿言廬

生狀貌老少不常亦不見其飲食所論多奇怪

范儕水經注枝江東南富城洲上有精廬儕居之自言巴東人少遊荆土多盤桓縣界惡衣食蕭散自得言未來事多驗人心欲見欵然對面尋求之終弗遇也雖逕跨諸州未嘗見其濟涉

釋道悟指月錄婺州東陽張氏子神儀挺異幼而生知年十四出家精修梵行謁徑山國一受心法服勤五載復謁石頭言下頓悟後居天皇客無貴賤皆坐

而揖江陵尹僕射裴公稽首問法師接之無加禮裴
愈歸向按指月錄有兩道悟一住荆門天王寺係渚
宮崔子玉之裔

崇信指月錄澧州龍潭崇信禪師渚宮人也其家賣
餅師少而英異初道悟和尚潛居天皇寺人莫之測
師家於寺巷常日以十餅餽之天皇受之每食畢留
一餅曰吾惠汝以廕子孫師一日自念曰餅是我持
去何以反貽我耶其別有旨乎遂造而問焉皇曰是

汝持來復汝何咎師聞之頗曉元旨因投出家皇曰
汝昔崇福善今信吾言可名崇信由是服勤左右師
後詣澧陽龍潭棲止

五代王保義女保義為荆南高從誨行軍司馬生女
不食葷血五歲通黃庭等經及長夢渡水登山見金
銀宮闕云是方丈仙女數十人中一人曰麻姑相結
姊妹授以琵琶數曲自是數夜一遇一夕復夢麻姑
曰即當相邀明日庭中有白鶴音樂女奄然而逝

舊

通志

遠法師江陵人遊靈鷲山有檀越獻柿寄於冬青樹
三年一結實味苦不堪食故大統間有冬青樹生柿
之異

舊通志

元侯大中公安人號損齋儒術道業迥出尋常大定
初應召建國醮宣授師號而歸未逾年產芝二莖於
堂七朶色如青玉有詩集傳世學士元明善撰記

舊

通志

趙惠宗宜都人得九仙錄祕法忽於縣東北積薪自
焚衆往觀之宗怡然坐火中斯須化為瑞雲仙鶴而
去火既盡其下草猶青得遺詩二首傳於世

舊通志

張守清名洞困號月峽叟宜都人幼習舉子未成棄
去更為縣曹掾年三十二嘆曰河清可待人壽幾何
奈何不早為計退隱於清微妙化巖精修上道一日

乘白鶴冲舉

舊通志

明癩和尚洪武初年有癩和尚行乞於市腥穢觸人

人皆惡之一日卧佑聖觀中道士費道元問之曰老
衲癩甚亦自覺臭否曰不聞又以薰爐置其側曰香
否曰不聞費曰若是則鼻不能辨香穢矣和尚笑曰
沉檀香滿太虛卻無受處穢惡腥聞太虛亦無染處
子以我為癩耶因解衲示之膚若凝雪道人異之乃
作禮已遽失和尚所在

舊通志

好了道人不知何許人亦不知姓氏體貌怪古椎結
芒屨性嗜酒飲數石不醉善為巧法奇中能使鬼正

德間常往來宜都山中叩其姓氏笑而不答但點首曰好了人以故呼為好了道人居無幾大疫道士遍詣諸疫者家呼曰爾曹急去毋因此一方人也疫遂止道士亦去莫知所之

雷九功夷陵人生有異相手可過膝少不慧一日有張道人呼其小字功遂從之遊引入一樓飲食歌舞非人間有一日欲之長陽令功閉目耳中但聞風聲俄頃至歸過石門洞道人以土書月峽張仙數字至

今猶存久之道人辭去遺功以詩功歸輒逆知來事
但曰吾以某日行矣至期卒年僅弱冠大風拔木道
人所遺詩忽失所在卒後三十五日室有火光視之
得功手書別家人詩人以為尸解云

王相監利人補弟子員讀書城南小園月夜輒有黃
冠扣戶入與譚黃白術後則當晝亦來相事母極孝
又不欲以牲殺供甘旨黃冠授以弓小如鈞以筋為
矢命射小雀發輒中往來三年許黃冠忽辭曰吾去

三十年復來比相五十已忘之矣其初度日忽憶前
約亟起詣園則黃寇已至即張筵黃寇因指壁門隙
呼男子美女六七人奏音樂樂畢以土書詩几上前
二句字不可曉中云當年猶有維摩筆今日卻無鍾
子音閒敲幾句乾坤老朗誦一聲天地驚勸君早擲
王喬鳥同作崑崙闕上人振衣而去約以中秋蟬鳴
伺我階除是夕蟬自雲中墜鳴不休相舉手拾蟬而
逝越三日如生

朱瘋子不知何許人類癩者居青谿言人禍福多奇
中時乞有餘咸給衆乞一日謂土人吾且死幸瘞吾
衆允之居歲餘後有見瘋子荷擔而行者衆大駭共
發塚空穴而已

了機形類僧自云從終南山來初居崔家洞一年及
遊鹿苑見招仙巖洞居之歲餘忽謂人曰吾閉闕幸
為塞垣穴七七日土人如其言一日巖罩濃雲闕門
洞開衆大駭乃相與攀巖開垣穴洞視之不見惟蒲

團草履存焉

羅萬策字明獻夷陵人少遊太學有聲仕郡佐視事
輒病退則否因決意致仕當走長安時夢入一古剎
兩沙彌前導至一室有大書法朗二字自是常夢至
其處及解任後道經一寺恍如舊遊須臾二沙彌前
迎歷歷如夢中至一室則大書法朗二字在焉策異
而叩之則曰師祖法朗坐化已久矣自是策每題咏
輒自識為法朗云

以上舊通志

襄陽府

上古真武明一統志淨樂國王太子也生而神靈察
微知遠長而勇猛惟務修行志除邪魔遇紫虛元君
授以道祕遂越東海遊覽又遇天神授以寶劍入武
當山修煉居四十二年功成白日飛昇奉上帝命往
鎮北方披髮跣足躡離坎真精建皂纛玄旗統攝玄
武之位神威赫然歷代顯著本號玄武宋避諱改曰
真武

周鬼谷子續文獻通考晉平公時人姓王名詡居遠安常入雲夢山採藥得道顏如少童隱居青溪之鬼谷因以自號蘇秦張儀嘗受捭闔之術三年辭去鬼谷子曰二子輕喬松之永壽貴一旦之浮榮惜哉處人間數百歲後不知所終

漢戴孟神仙傳本姓燕名濟字仲微漢明帝時人入華山及武當山受裴君玉珮金璫經及受石精金光符復有太微黃書能周遊名山舊通志載孟落帽於

武當山之上迄今呼曰落帽峯

馬鳴生神仙傳臨淄人本姓和字君賢少為縣吏捕賊被傷暫死遇神人以藥救之便活遂棄職隨神周遊天下勤苦歷年受太陽神丹經三卷歸入山合藥服之不樂昇天但服半劑為地仙經歷九州五百餘年後乃白日昇天而去舊通志作歸入武當山合藥服之未詳何本

陰長生神仙傳新野人漢皇后之親屬聞馬鳴生得

度世之道乃尋求之同時共事者十二人悉歸去惟
長生執禮彌肅鳴生告之曰子真能得道矣乃將入
青城山中煮黃土為金以示之授以太清神丹經丹
成大作黃金十數萬斤以惠貧乏周行天下與妻子
相隨一門皆壽後於平都山仙去舊通志作聞馬鳴
生隱太和山本明一統志

晉竺法慧神僧傳關中人建元元年至襄陽止羊叔
子寺不受別請屢著神異臨死語人曰吾死後三日

天當暴雨至期果洪雨如注城門水深一丈

劉永常字道通歷陽人少英毅仕羅邑宰博覽羣書
有遯世之志太康中辭官遂上武當結茅於石上不
數年能飛行絕壁自號謝羅仙謂謝宰羅之官也

通志

釋道安神僧傳姓衛氏常山扶柳人七歲讀書再覽
能誦年十二出家至鄴師佛圖澄及石氏將亂與弟
子慧遠四百餘人渡河南遊既達襄陽復宣佛法

惠遠神僧傳本姓賈氏雁門樓煩人年十三隨舅令狐氏遊學許洛博綜六經尤善莊老年二十一欲渡江與范宣子共契值中原寇亂南路阻塞時沙門釋道安立寺於太行恒山弘讚像法便與弟惠持俱投之後聞講般若經豁然悟舊通志作居襄陽按隋經籍志沙門衛道安分遣弟子各趨諸方道安與惠遠之襄陽後至長安苻堅甚敬之

耆域神僧傳天竺人周流華戎靡有常所自發天竺

既達襄陽欲寄載過江船人見梵沙門衣服敝陋輕而不載船達北岸城亦已渡前行見兩虎虎弭耳掉尾以手摩其頭虎下道而去

唐龐蘊其先衡陽人徙家襄陽指月錄字道元世本儒業少悟塵勞志求真諦唐貞元初謁石頭後參馬祖悟後以舟盡載珍索數萬沉之湘流舉家修行將入滅謂刺史于頔曰但願空諸所有慎勿實諸所無言訖枕于公膝而化遺命焚棄江湖

劉白雲不知何許人家富好義在江都市遇一道士
謂之曰子有仙骨而流浪塵土中何也因出袖中兩
卷書與之後白雲寓襄州隔江小山上化兵士數千
於其中紫雲帳幄天人侍衛連日不散節度使于頔
疑其妖引兵攻之白雲縱馬與從者四十餘人走漢
水之上感波起塵如履平地追之不得

舊通志

宋陳搏宋史列傳搏字圖南亳州真源人始四五歲
戲渦水側有青衣媪乳之自是穎悟日益及長讀經

史百家之書一見成誦悉無遺忘頗以詩名後唐長興中舉進士不第遂不求祿仕以山水為樂自言嘗遇孫君仿麀皮處士二人者高尚之人也語搏曰武當山九室巖可以隱居搏往棲焉因服氣辟穀歷二十餘年但日飲酒數杯移居華山雲臺觀後太宗召見賜號希夷先生

王鼎明一統志襄陽人初寄身醫卜後遇鍾離得仙術自號王瘋子不見其飲食嘗行江干人見水中有

二鼎影怪問其故曰若欲更見之乎須臾見十影衆皆驚異真宗召至禁中長揖不拜後辭去不知所之所著有修真書

田蓑衣不知其名居武當山隱仙巖石室中冬夏止一蓑衣人因以此稱之隆冬則真氣如蒸盛夏則溫涼如玉人有疾厄摘一草吹氣與之服即愈常煉九還大丹端平間失所在今丹室爐竈存焉

舊通志

謝天地不知其姓名絕粒不食步履如飛居南巖石

室中石壁萬仞下臨深澗雖猿鶴莫能往來飛行自
若有問者但應之曰謝天地餘無他語人以是名之
後仙去云

曹觀妙名侍德峴山人幼入道居武當嗣玉龍之派
端平三年罹兵難白膏凝膚畧無血刃者驚拜而去
房長鬚不知其名宋南渡後隱居武當日以栽杉為
事今玉龍宮後杉皆其手植一日忽遇道者曰予神
清矣惜無鬚以手頷之經宿覺有物如絲縈於胸臆

視之鬚已長尺餘甲午三月一日清旦人見雲中隱
隱有跨鶴之形視其故居惟杖履在焉

以上舊通志

蔡女仙續文獻通考襄陽人幼喜刺繡忽有老父詣
門請繡鳳眼畢工之日自當指點既而繡成老父指
示安眼畢各乘一鳳去人名其地曰鳳林關

孫寂然名元政嗣業茅山得上清五雷諸法遍禮名
山時江漢罹甲兵之厄武當殿宇為空紹興辛酉首
登武當興復開闢以符水禳禱為民除疾衆皆歸之

數年間殿宇悉備高宗召赴闕稱旨後還山仙去冠
劍藏於桃源之東

鄧安道寂然弟子幼隨師開復武當盡得其法駕風
鞭霆如響遠邇有疾患者皆趨之奉敕住玉龍始作
正殿頑石壁立默施神用一夕雷雨破其石嘉泰中
預告徒衆而逝大風拔木移時方散人謂乘風去有
劍壑宮北云

釋宗頤號慈寬襄陽人父早亡少習儒業二十九歲

禮真州秀禪師出家元祐中住長蘆寺迎母於方丈

東室製勸孝文葦江集坐禪箴

以上舊通志

元汪真常名思真宋丞相伯彥之後入武當山至元
乙亥領徒衆六人開復玉龍黑虎為之引導吉凶預

知後無疾蛻去

舊通志

明張三丰遼東懿州人姓譜洪武初至太和山修煉
結庵玉虛宮五樹邊身長七尺美髯如戟經書一覽
即成誦寒暑惟一箬笠日行千里靜則瞑目旬日所

啖升斗輒盡或辟穀數月自若也洪武二十六年九月二十日自言辭世留頌而逝民人楊軌山等置棺殮訖臨窆發視之三丰復生後入蜀見蜀王又入武當或遊襄鄧間永樂中遣使尋訪不遇為宮以待之應顯不測莫知所在時稱張仙云

鄧清陽南巖道士生於元季早歲入武當從高士學黃老又治莊列周易參同龍虎大丹諸書深得其奧凡所寓興皆有激發在武陵有忘情消白日高卧看

青山之句所著觀物吟又曰警世文洪武初年吳中
人多有識之者後不知所終

舊通志

丘元清富平人洪武初遊武當見張三丰舉為玉龍
宮住持有司以賢才薦於朝授監察御史賜室力辭
弗受轉太常卿每遇大祀天地上宿齋宮詔以雨暘
之事奏對有驗暇則凝神默坐一夕謂門徒曰明日
乃吾全歸之辰至期果逝

舊通志

楚子李續文獻通考正德間太和山得道者以其辟

穀但噉麥麩故名荆藩永定王禮聘至寓斬武當宮
衣破衲不食屢迎入宮祈長生訣不對但云儒者修
身齊家而已賜金帛甚厚皆委棄辭歸王遣十校送
之至漢口卧舟中忽不見後復遣校至山則云尸解
矣校歸又見其持鉢行走如飛

柴道人號五溪崑山人初為太學生其父叔皆進士
父早卒會母死請卹還至潤州作書付家人先歸曰
吾謁武當便還比發書乃遍謝姻黨且與妻訣亟遣

人追至武當業為道人矣師事姦子李傳其煉氣之法嘗訪范小仙適靖江王以金施范納之道人嘆曰尚須人養養耶遂去范尾至光化呼之畧無轉顧意步履如飛竟不能及

舊通志

鄖陽府

漢費長房後漢書列傳長房汝南人曾為市掾市中
有老翁賣藥懸一壺於肆頭及市罷輒跳入壺中市
人莫見惟長房見之遂欲從之求道顧家人為憂翁

乃斷一青竹與房身齊使懸之舍家人見之乃長房身也以為縊死驚號殯之於是隨翁入深山踐荆棘於羣虎之中獨處不恐又卧於空室以朽索懸萬斤石於心上衆蛇競來齧索且斷房亦不移復使食糞糞中有三蟲臭穢特甚房意惡之翁曰子幾得道恨於此不能成如何長房辭歸翁與一竹杖曰騎此任所之自至矣既至投杖葛陂中又授一符以主地上鬼神長房遂乘杖歸未幾至自謂去家若旬日而已

十餘年矣以杖投陂顧視則龍也章懷太子注陂在
今新蔡縣西北舊通志載縣西長望川有化龍堰房
山廟即祀長房未詳何本

南北朝釋寶誌南史陶弘景傳沙門釋寶誌者不知
何許人有於宋太始中見之出入鍾山往來都邑年
已五六十矣齊宋之交稍顯靈跡至梁天監十三年
卒舊通志載今月明山湘溪巔鎖峯橋紫規寺皆坐
禪處

黃衣和尚未傳其名初創保康邑時居豬腸洞一小庵中嘗衣黃衣因號之凡遇虎豹叱之而馭渡津涉水衣履不濕後不知所終

舊通志

明狗陪僧鄖縣北有漚溝寺弘治中一雲遊僧自蜀來攜一狗朝夕與之同食三十餘年一日與狗偕然化去遺一皮在寺中今俗名狗皮寺又稱狗陪寺

舊

通志

趙氏不知何許人頭著銅帽重可三斤寇唐中其上

眉長五寸辯而繫之中不火食或巢居或巖棲或宿
人簷下往來無定跡初住一山多古木嘉靖丙辰忽
移於竹之滄浪山人問其故答曰此山將童矣未幾

三殿告災採木使者果童其山

舊通志

八里川孫氏素悍一日有道人募食孫予之若有秘
語狀既去孫忽發狂每夜大叫夫厭甚欲擊之孫覺
抱一雄雞奔騰如雲至小八里巖壁上往來如登平
地雞亦鳴啼不已夫至視之大叫曰爾去孫娘娘不

食人間烟火若不相忘於丁巳年八月十五日取我
骸骨於此言訖不見至今露匣一半風雨不壞

郡志

方伎

附

武昌府

晉王廙名畫記字世將臨沂人善屬詞工書畫過江
後為書畫第一時鎮軍謝尚於武昌昌樂寺造東塔
戴若思造西塔並請廙畫

南北朝蔡鐵善卜為南郡王義宣府史王鎮武昌於

內齋見一白鼠緣屋梁上命左右射得之納函中命
鐵卜之鐵曰白色之鼠背明面戶彎弧射之絕其左
股腹孕五子三雄二雌若不見信剖腹而知王命剖
之如其言賜錢萬貫

舊通志

唐朱翁鄂州道者得縮地術築室穿池環布果藥手
種松檜皆成十圍而未嘗遊於城市有州將陳士明
幼而勇居常以鬪雞為事每狎翁翁曰爾孺子無賴
吾試戲爾士明之居相去二三百步翁以酒飲之使

其歸取雞來鬪自辰而還至酉不達度其所行逾五十里顧視不越百步士明亟返拜求恕翁笑曰孺子更敢侮我乎士明曰不敢翁乃釋之

舊通志

明吳偉分省人物考字次翁江夏人少孤貧善畫與俗寡諧一言不合輒投硯去成化間成國公棊以小仙呼之因以為號憲宗召至閣下授錦衣鎮撫待詔仁智殿偉有時大醉被召蓬首垢面曳破皂履踉蹌行中官扶掖以見上大笑命作松泉圖偉跪翻墨瀋

信手塗抹而風雲慘慘生屏障間左右皆動色上歎
曰真仙筆也偉出入掖廷權貴人求畫多不與因數
短之乃放歸孝宗即位復召見便殿閱畫稱旨授錦
衣百戶賜畫狀元印章按楚會存書稱偉嘗遇龐眉
老人擊石得髓偉飲其半遂以畫名事尤奇絕

趙夢弼字肖野先世浹川人徙居江夏年至八十因
呼肖翁家世善醫精脉法凡診諸病者以一二語發
其隱投藥立效胡方伯病且死邀翁至發藥兩匕而

痊赴人之急百里外中夜叩門無不應者既老猶杖以往歲大疫煮藥如池全活甚衆年八十八卒

羅鍊江夏人故儒家深醫學診脉斷人生死不爽御史李某吐墨痰診之曰是殆有所思不遂也李起拜曰神醫也吾少貧婚李氏為婦翁所嫌離去婦為我死故致此病耳服藥立愈楚王妃周氏微恙診之曰是殆不起即在今午時妃猶飲食言笑王不信俄中風逝一傭人自言某覺首在下足在上何也羅俯思

良久目地下鐵杵可重六十斤曰汝試捧而上下之
如是者三曰愈乎曰愈矣首在上足在下矣問故曰
汝以用力傷經絡心故逆轉特為反正之諸如此類
著醫書授其子一日其子乘醉為人視疾鍊怒曰奈
何以人性命為戲焚其書無傳者

以上舊通志

皇清胥秉哲字匡生黃岡籍江夏人性穎異博通書史
家世業醫哲尤深悟其理嘗遊吳會燕豫間遇沉
病投劑即痊有徐某妻孕而疾延診脉曰條隱條

現尺中有神非癥非痞結為狐形以藥投之果產
異物年中丞夫人病革已就木哲後至觀其色以
為可活乃藥於木中須臾聞聲息竟獲再生王方
伯女患痘已死哲見曰生氣猶存藥之而起其他
神效多類此著有診法精微等書子肇慶習其業
孫元長江夏廩貢

漢陽府

唐童志高孝感人有異術一日以旱刺泉范公塘謂

其弟子曰吾若駕龍入泉窟當索符亟與我及志高
從水中出手索符手有毛弟子大駭走志高遂沒不
出土人祠之至今禱雨多應

舊通志

皇清陳五太字健夫漢陽人精岐黃術能知人死生凡
診視隨手輒應不趨權貴御史吳達及郡縣屢請
俱鑿坏而避喜與寒士交年八十卒里中舉人范
儀作傳予泌孫夢龍皆善醫謹厚亦如之

李序韓字原漢漢陽人善畫花鳥畫成張壁間蹲

立四旁遠近靜窺其偏反飛鳴之態身自作勢以
曲摹之少不如意即碎去性介潔畏見俗人片語
不合輒作色而遁常有監司持金索畫力却不應
監司怒命役往拘潛匿古廟龕下三日不食終弗
就晚年能書工作詩月煨季煉有唐人風年六十
餘而卒無子

黃州府

唐道泓續文獻通考黃州人幼為沙門與天官侍郎

張敬之厚善所言吉凶無不驗嘗為張說視宅見東北隅有三坎丈餘泓曰公富貴一世而已諸子將不終說懼將平之泓曰割他肉補瘡疥無益也後說子汚祿山斥死

宋龐安時宋史列傳安時字安常蘄水人兒時讀書過目成誦家世醫父授以脉訣安時曰是不足學學黃帝扁鵲通其說時出新意辯論不可屈父大驚已病曠乃益讀靈樞太素甲乙諸秘書及經傳百家之

涉醫道者遂著難經辯主對集本草補遺為人治病
立愈病家持金謝不取有婦產且七日不下安時令
持湯熨其腰腹自為拊摩上下有間微痛舉子人問
故安時曰兒出胞手持母腸藥石之所不及吾捫兒
手針其虎口即縮取兒視之果然其神妙類此年五
十八病作門人請自診笑曰吾察之久矣且出入息
亦脉也今胃氣絕死矣後數日卒

元葉如菴黃岡儒醫診視有方撰傷寒大易覽一編

為時所宗

樊子晉麻城人讀書明理審病察脉預知人十年生

死醫家宗之

以上舊通志

明楊先春蘄水人膂力絕倫有大盜劫其家先春舉石礮盛茶飲之盜驚散去又嘗被盜春曰我與若較騎射可乎乃揚鞭走馬衝突於槐柳之下已而伸手抱槐樹以雙足夾馬懸半空中盜大恐而去會蘄州紅旗賊衆數千人駐羊角尖當事檄先春督剿春手

拔樹起以為器械擒其魁賊平復隨征麻陽洞有功
予以官力辭不受里人呼為楊公健八

陶仲文黃岡人故姓潘父為陶氏養子因以為姓仲
文少為掾喜方術授符水訣於羅田萬玉山又從邵
元節遊嘉靖初元節得幸會宮中黑青見薦仲文代
已試之妖果絕扈駕南巡授神霄保國宣教高士歲
餘進神靈保國弘烈宣教振法通真忠孝秉一真人
領道教事尋加少保禮部尚書進少師少傅兼少保

明代元勳無兼三孤者時論榮之二十九年春不雨
上問仲文奏疑有冤獄上釋都御史胡纘宗等是夜
大雨封恭誠伯死年八十賻恤甚厚隆慶初追奪官
爵籍其家

以上舊通志

宋子京黃岡人學舉子業不售去而學醫久之悟素
問靈樞六腑內外穴穴相應又心智洞朗一望即知
病源有巡道無他病但不能食郡守以子京進子京
曰且無往當先觀之巡道出子京從與上一觀乃敝

衣冠垢汙而進巡道不悅出而語人曰病瘳矣次日
呼子京入則美其衣冠巡道曰昨日不如此大致余
怒子京曰昨日垢敝乃醫公者也公生平常得喜病
一怒而喜消病愈便能食矣遊會城中見舁棺者漏
血一滴子京曰此可生也問之則婦以難娩死呼其
夫開棺針之娩一男母子俱全嘗視郡守脉謂十年
後當領西南節鉞然必墜下頰至十年撫蜀果病且
兩月急走人邀子京治之子京至入署交拜以手掖

撫軍起而下頰已上矣

萬全字密齋羅田諸生隱於醫著書甚多尤精痘疹
一日在鄉先生家有兩新婦進欲全避鄉先生曰萬
先生老無妨也兩婦入年俱二十餘全曰此皆未痘
痘將作矣一可救一不可救越一月兩婦布痘果如
其言遊郡城有布痘者死已半日全過其門視之曰
可活置汙泥中三日痘復發進藥數匕而蘓有豪少
年聞其名不為心服一日佯大病重幃密室呼全診

脉全診之曰越十五日當死不可救何須藥少年掀
幃叱之曰我何病聊試汝耳全曰診視如此不知病
也果至十四日病死

舊通志

龐鹿門蘄州人幼從李時珍作本草綱目視神農多
三千品視唐本草多一千五百品視陳希夷著多五
百品凡蟲魚鳥獸草木天地內外無所不包又復考
核詳究盡生生變變之妙鹿門得瀕湖之學不肯輕
出以試人至老乃出有客耳聾數十日以補藥投之

不效就鹿門理脉曰胃家火也客曰耳屬腎與胃何涉鹿門曰公未知素問靈樞耳胃經絡起某處過於耳旁或於食時則聾更甚一七而愈州守夫人病瘥診之曰此瘥勿藥有喜但過十日當血下夫人不悅遂不請其方越十日而夫人血下邀鹿門亦一七而

愈好說素問靈樞醫家罕有知者

舊通志

朱顯綬字熙菴廣濟人少有隱德喜讀書尤深於易精卜筮常學丹術於王雲鵠登樓設榻足不履地者

數年自是解觀天象知世變有幾先之哲避江濱人

士依之以安

舊通志

安陸府

明黃升字啟東京山名醫善察脉有分巡戚某晨興
忽疾作不語呼升視之升曰脉與症不應乃詢其左
右云夜食烹雞升曰此必食後就寢有蜈蚣過口鼻
中毒耳為處劑投之立甦戚猶未信乃更烹雞置寢
處果有蜈蚣三自牀頂而下又有王氏二子俱諸生

母病請升治之診脉曰微恙耳數濟愈二子并以脉示升升驚曰二君脉俱不佳明年相繼歿又廩生張才仕病升診之曰無恙君賤脉至當防試事明年督學至果停其廩其他奇中皆類此

舊通志

李守貞居白鶴觀有道術能於掌中起雷大旱請雨結壇如常法刻期須應至日於鴨嘴山雲霧中見壯繆公高冠擁劍現已而洪雨如注李易其裔徒也頗傳其術嘗為天門人祈雨有應縣官以匹馬謝之

舊

通志

孔蓑衣嘉靖間道人過京山就賣菜兒吃蘿腹欣然
與二枚孔曰汝明日微有財已而從食店求食店人
叱之孔曰勿叱不久此且為赤地明日店果火賣菜
兒於餘燼中拾得銀半錢

舊通志

德安府

五代馬處謙安州人病瞽鬻筮自給有一人謁筮謂
處謙曰子之筮未臻其妙能從我遊乎乃隨往陶仙

觀授星算之訣誠之曰子有官祿終於五十二歲處謙得訣事多奇中後從趙匡明入蜀官至中郎金紫

果五十二而卒

舊通志

宋僧智緣宋史列傳智緣隨州人善醫嘉祐末召至京師每察脉知人貴賤休咎診父脉而能道其子吉凶所言如神士大夫爭造之熙寧中王韶謀取青唐上言番族重僧而僧結鄂特且拉主部帳甚衆請智緣與俱至邊神宗召見賜白金遣乘傳而西稱經畧大

師智緣徑入番中說結鄂特且拉歸化他族俞龍珂等皆書款韶頗忌惡之言其撓邊事召還以為右街首坐卒

明吳彥德隨州人少業儒屢試不售棄就醫凡有疾病不瘳者咸詣其家欣然療之遇窮困者凍與衣饑與糧鄉人稱為篤行君子于旻舉於鄉

舊通志

荊州府

周養由基楚人左傳成公十六年晉侯及楚師戰於

鄆陵潘廸之子黨與由基蹲甲而射之徹七札焉呂
錡射共王中目王召由基與之兩天使射呂錡中項
伏弋以一天復命國策養由基善射去楊葉百步射
之百發百中呂氏春秋荆王有神白猿王自射之則
搏樹而嬉使養由基射之始調弓矯矢未發猿擁樹
而號一發中之王大悅

秦南公楚人善言陰陽識興廢之數嘗曰楚雖三戶
亡秦者必楚也漢藝文志南公十三篇在陰陽家流

漢司馬季主史記日者傳楚人賣卜於長安東市宋忠賈誼同日休沐遊於卜肆季主方與弟子辨天地之道日月之運陰陽吉凶之本二大夫再拜謁季主復理前說數千言莫不順理於是攝衣而起再拜辭行

晉桓石虔晉書桓彝傳龍亢人孫虔小字鎮惡有才幹趨捷絕倫從父豁在荊州於獵園中見猛獸被數箭而伏諸督將素知其勇戲令拔箭石虔因急往拔

得一箭猛獸跳石度亦跳高於猛獸復拔得一箭以歸

南北朝陸法和北齊書列傳法和不知何許人隱江陵百里洲者老自幼見之容色常定人莫能測入高要紫石山無故去俄蠻賊果亂人以為前知侯景遣將任約擊湘東王曰侯景無足慮蜀賊將至已果然一戰殄之軍次白帝謂人曰城旁有諸葛弩鏃一斛許掘之如其言至襄陽城北大樹下畫地令子弟掘

得龜故之在江夏慮梁室衰嘗聚兵欲襲襄陽元帝
止之法和謂帝疑已乃還州壘其城門白衣坐葦席
及聞元帝敗著凶服哭之

庾季才北史列傳季才字叔奔新野人八世祖滔家
於南郡江陵縣季才幼穎悟十二歲通易好占元象
居喪以孝聞梁湘東王繹引授外兵參軍西臺建累
遷中書郎領太史令封宜昌伯勸還都不從俄而江
陵覆滅周文帝一見深加優禮令參掌太史初荆覆

亡衣冠士人多沒為賤季才散所賜財物購求親故
周文感悟令免梁俘為奴婢者數千口宇文護執政
問以天道徵祥對曰頃上台有變不利宰輔公宜歸
政天子請老私門及護夷滅特賜粟帛遷太史中大
夫封臨潁伯後加開府儀同三司及隋文帝為丞相
嘗夜召問天時人事季才曰天道精微難以悉察竊
以人事卜之符兆已定縱言不可公得為箕潁事乎
帝默然開皇元年授散騎常侍帝將遷都夜與高潁

蘇威定議季才旦奏圖記龜兆允襲宜遷徙帝愕然
曰何其神也遂詔施行九年出為均州刺史仁壽三
年卒季才局量寬弘術業優博篤於行義志好賓遊
常為文酒之會所著靈臺秘苑一百二十卷垂象志
一百四十二卷地形志八十七卷子質孫儉俱有學
識傳其業

唐僧那酉陽雜俎荆州陟岵寺僧善照射每言照射
之法凡光長而搔者鹿貼地而明滅者兔低而不動

者虎又言夜格虎時必見三虎并來旁挾者虎威也
當刺其中者虎威入地得之可却百邪虎初死記其
頭所藉處候月黑夜掘之掘時必有虎來吼擲前後
不足畏乃虎之魂也深二尺當得物如琥珀蓋虎目
沉淪入地所為耳

王彥伯荊州道士唐國史補彥伯自言醫道將行列
三四竈煮藥於庭老幼塞門而請彥伯曰熱者飲此
寒者飲此風者飲此氣者飲此各負錢帛來酬無不

效者酉陽雜俎裴尚書子忽暴中病衆醫拱手迎彥伯視之候脉良久曰都無疾乃煮散數味入口而愈裴問其狀彥伯曰中無鰓鯉魚毒也其子果食鱠得病裴初不信乃鱠鯉魚無鰓者令左右食之其疾悉同始大驚服

白皎荊州人有法術河陽從事樊宗仁過江陵為舟子王升所侮因答之易他舟上峽不旬日舟忽失纜篙棹皆不能制舟人曰此舟已為讐人所禁歷石灘

必沉溺不如先具備焉翌日至灘船果覆賴有備得
免宗仁與僕蔭於樹下及夜深忽見山獠五人列坐
皆挾利刃宗仁大呼語以故山獠曰峽中行此術者
甚衆唯王升者非白皎弗可制吾為若延之明日皎
至掃地為壇步立中央呼召王升不絕口良久乃至
則王升形魂焉皎數以罪狀升號泣而去宗仁解衣
贈皎皎不受後至江陵訪王升皎召之夕已死

舊通

志

薛少尹寓居渚宮荆南節判司空薰與京兆杜無隱
及蜀梁震俱稱進士常訪少尹一日薛謂薰曰閣下
與京兆勿議求名必無所遂杜亦不壽惟梁秀才者
此舉必達登第後一命不沾也後皆如其言

舊通志

王棲霞字湘川寓江陵白鷺湖善治易所居手植桃
成行時比之董奉棲霞笑曰吾獨利其花核祛風導
氣耳每清旦布著為人決事取貲僅足一日計大厯
中有老父持百錢來筮卦成棲霞驚曰家去此幾何

老父往矣不然將仆於道老父出棲顧百錢乃紙也
因悟其所驗之辰則棲霞甲子乃歎曰吾雖少而學
易不自意能幽入鬼鑒死復何憾即沐浴更新衣而

終

舊通志

梁新武陵醫士崔鉉鎮渚宮時有富商船居中夜暴
亡至明氣猶未絕新聞之乃與診視曰此乃食毒也
問其僕曰汝主翁尋常嗜何物曰好食竹雞每年不
下數百隻新曰竹雞喫半夏必半夏毒也命絞薑汁

灌之良久甦崔聞而異之資以僕馬錢帛入京致書

於朝士聲名大振仕至尚醫奉御

舊通志

張仕政西陽雜俎荊州外科善治傷折有軍人損脛
求治張飲以藥酒破肉取碎骨一片大如兩指塗膏
封之數日如舊二年餘脛忽痛問張張曰前所出骨
寒之則痛可遽往覓也果獲於牀下以溫湯洗貯於
絮中痛即止

宋劉童子善相及命術遊荆南謂夏侯嘉正曰君將

來須及第亦有清職惟須清貴已俸外有百金橫入

不病則死後官至正言餘皆驗

舊通志

明黎福榮監利人善風角洪武初年召見卜事屢驗

上顧謂曰汝可方素天綱矣遂賜名天綱授官寵異

之復官其子楚章為鴻臚寺序班

舊通志

鄧權監利人善風角嘗戍武昌隨楚王入朝時永樂
在燕亦來朝同宿邸第以物命之卜果驗因大書明

鑑二字賜焉

舊通志

艾弘監利人善鍼灸診脉知人生死歲月多所全活
不責其報用薦入為太醫院官督學使病召弘往視
望見輒曰公之金木俱病豈飲後常露坐耶督學使

起謝一藥而愈

舊通志

李恒江陵人從父宦粵喜施予遂棄儒業醫父止之
恒曰家世以來冠進賢者不下十餘人何愛一第恒
自料為官亦無補且材力俱不足濟人不如學醫遂
以醫擅一時里中病疫者恒攜僕挈藥囊偕行遍診

其脉藥之或舉家不起則留一僕以伺日餽薪米愈

乃已

舊通志

葛天爵監利人少治醫術見同列無愈已者遂徧訪

湖山遇一道士於江上與語輒解登舟語數月遂精

脉理用藥每奇中

舊通志

萬拱監利人能詩神於醫術著醫學大成傷寒指南

若干卷惜多散亡病源一書尤前此所未有然性頗

矜直懶晉接有召者輒以病辭而饋以方焉

舊通志

襄陽府

漢張機名醫錄南陽人名機仲景其字也舉孝廉官
至長沙太守以宗族二百餘口建安紀年以來未及
十稔死者三之二而傷寒居其七乃著論二十二篇
證外合三百九十七法一百一十二方善醫者云仲
景著傷寒論誠不刊之典按舊通志作棘陽人

晉王叔和唐甘伯宗名醫傳西晉高平人性度沉靜
博通經方精意診處尤好著述其書纂岐伯華陀等

論脉要訣所成叙陰陽表裏辨三部九候分人迎氣
口神門條十二經二十四氣奇經八脉五臟六腑三
焦四時之疴纖悉具備咸可按用凡九十七篇宋林
億等校正按舊通志載因亂僑寓襄陽著書行世

湖廣通志卷七十四

欽定四庫全書

湖廣通志卷七十五

僊釋志

方伎附

長沙府

晉陶淡晉書列傳淡字處靜太尉侃之孫幼孤好導
養之術服食絕穀不婚娶終日端拱讀易善卜筮於
長沙臨湘山中結廬居之養一白鹿以自偶親故有
候之者輒移渡澗水莫得近之

南北朝張岳任彥升述異記岳字巴玉清河郡人也
齊明帝時仕至司空及東昏侯嗣位攜家去闕思樂
林泉忽一日有叟告曰瀟湘之南有壽山山有朱陵
洞可以樂隱遂操舟沿流上而造焉聞洞南有麒麟
山者漢代蘓隱真人隱此得道白日駕麟車而冲天
於是傾家南來止此修真司空躡足登雲全家八十
餘口白日冲舉

饒道亨元虞集集茶陵真人姓饒名道亨梁大同中

嘗為吏性正直不阿厭吏事自免去修行於舍夢神人自稱老君告曰吾有符章盛以玉函在子宅中得之當詣雲陽山紫薇真人學之則道成旦起掘地數尺果如夢即馳詣雲峯見有寶冠金衣者先在語之曰吾待子久矣遂禮之授以斗極天心之法歸行五七年救人危難不可數計一日空中樂音雲氣若擁車駟而至者遂乘之僊去

唐緄僊姑列仙傳長沙人入衡山修道年八十餘了

然無侶居傍南嶽魏夫人仙壇忽一青鳥飛來自言
我南嶽夫人使也以姑修道清苦命我為伴每有人
遊山青鳥必預言其姓名一日曰今夕有暴客至姑
無怖果有羣僧持火挺刃欲害姑姑在牀上僧不得
見而出俱為虎所殺姑徙居湖南烏亦隨之後隱九
疑莫知所終

沈鱗列仙傳字廷瑞彬之子也學道於玉笥山常衣
單褐風雪不易嗜酒工詩時呼為沈道者

彭幼謙湘陰人寒暑惟羽褐葺陶淡丹爐得大藥一

粒餌之年一百四十餘歲

見舊通志

懷素國史補長沙僧懷素學草書自云得草書三昧
書苑懷素與鄔彤為友嘗從彤受筆法彤曰長史私
教彤云孤蓬自振驚沙坐飛余自是得奇怪草聖盡
於此矣顏真卿曰師亦有自得乎素云吾觀夏雲多
奇峯嘗師之又遇折壁之路一一自然真卿曰何如
屋溜雨痕素起握真卿手曰得之矣

景岑祖燈長沙嶽麓第一世招賢景岑禪師有秀才
看千佛名經問曰百千諸佛但見其名未審居何國
土還化物也無曰黃鶴樓崔灑題詩後秀才還曾題
也未秀才曰未曾曰得閑題取一篇好

靈祐指月錄潭州為山靈祐禪師趙氏子十五出家
遊參百丈由是發悟司馬頭陀見百丈談為山之勝
丈語衆曰若得一語出格當與住持即指淨瓶問曰
不得喚作淨瓶汝喚作甚麼師踢倒淨瓶便出丈笑

曰第一座輸却山子也師遂往稱為仰宗焉

善覺祖燈長沙府華林善覺禪師常持錫杖夜出林麓間七步一振錫一稱觀音名號觀察使裴休進訪問曰還有侍者否師曰有一兩箇祇是不可見客裴曰在甚麼處師乃喚大空小空時二虎自菴後出裴驚悸師語二虎曰有客且去二虎哮吼而去

證空指月錄潭州龍牙證空禪師嘗曰學道如鑽火逢烟未可休直待金星現歸家始到頭又曰道者須

自悟去始得

太乙真君寓居太乙寺為藥池煉丹時疫癘大行家
書一符與以藥隨愈後莫知所之遺有藥池龍井尚

存

見舊通志

齊己黃山谷集齊己胡氏子益陽人居龍興寺作者
宮莫問十五篇以自見初捨俗入大瀉山參禪猛利
持律清苦晚歲牽情於詩遂作荊州僧正以終老

宋邵珮列仙傳湘陰人少與兄玘弟珪同游太學遇

至人歸都嶠山結菴脩煉元符初蘓軾自嶺表歸訪
琥留菴旬餘琥又於西蜀峩眉山結菴無何遁去但
留詩壁間云往往來來三十年更無踪蹟在西川功
成行滿昇天去回首山頭月正圓

梁野人列仙傳名戴長沙人遊方外兄顏守廬州戴
謁之顏令換衣冠戴曰山林風致惟事內觀何索我
於形骸之外即出寄旅邸貽守書曰弟野人以烟蘿
久候不果奉辭惟冀珍重仍遺所着敝衣異香襲人

殆非世所嘗聞乘空而升不知所往

麻田僊女善化有女姑七人結廬山頂脩煉踰年昇

去里人名其山曰僊女嶺

舊通志

元彭祖師不知何許人七歲來善化為人牧牛值歲旱師以杖掘地泉水如湧又禾若蟲蝗乃燃一燈於田中以米篩罩之即止居民日供飯食隨以雙箸挿地自誓云我成圓正宗師此箸復生果發生楓樹一

株師乃於此樹下化去

見舊通志

石飛亭仙女長沙李氏女生而能言自云麻姑化身
宅後有飛來石年十二遊其下拾一桃食之遂不食
人間烟火構亭於石上日坐蒲團年三十六仙去肉
身猶存有商張某過洞庭遭風覆舟忽一女子駕小
艇救之張問從何來曰吾家長沙石飛亭昨來會湘
君適見汝溺故亟援爾張心異之訪至石飛亭為立

廟祀焉

見縣志

皇清禹峯名智寧鄉賀氏子少攻舉子業及冠祝髮為

山為慧山法嗣第一人卓錫新化大梅山從者甚衆
有虎來法堂伏地受戒著有大為一燈錄詩文若干卷
阿諾名文惺湘潭周氏子祝髮清涼寺參嶽麓彌
嵩師初不曉文字一旦豁悟能詩文法語皆得正
詮開法南嶽曉霞峯後繼席嶽麓所著有南嶽游
僊記嶽麓雜咏若干卷

衡州府

漢成武丁葛洪神仙傳桂陽臨武烏里人也為縣小

吏少言大度不附人人謂之癡使京還過長沙二異
人與藥二丸令服之語曰君當得地仙還家明照萬
物獸聲鳥鳴悉能解之縣使送餉府君府君周昕留
在左右久之署為文學主簿嘗與衆共坐聞羣雀而
笑之衆問其故答曰市東車翻覆米羣雀相呼往食
遣視之信然也會行酒酒巡徧訖忽以杯酒向東南
嚙之曰臨武縣火以此救之明日臨武稱晡時火大
雨即滅雨中皆酒氣衆異之乃知非常人也後乘白

騾西行僊去

賣薑翁列仙傳未詳姓字在衡州市荷擔賣薑三十餘年顏貌不改偶遇一道人於茶肆謂曰吾有黃白之術徧求有常德者授之翁不應但就擔頭取薑一塊納入口中吐出即成黃金道士遂相顧而笑自是皆不復見

晉南嶽夫人魏華存列仙傳字賢安任城人司徒文康公舒之女幼而好道靜默恭介讀老莊黃庭三傳

味正耽元常欲別居閒處父母不許二十四適太保
掾劉文生二子乃離隔齋於別寢後得道仙去顏真
卿魏夫人仙壇碑銘夫人白日升晨北詣上清宮玉
闕之下授夫人玉札金文位為紫虛元君上真司命
南嶽夫人比秩仙公陶弘景真誥所稱南真即夫人
也杜甫詩恭聞魏夫人羣仙夾翱翔

施存號湖浮先生居衡嶽石室或跨白豹而出永康

元年四月昇舉

見舊通志

南北朝徐靈期修道南嶽十五年作衡山記記其勝
異能制虎豹役使鬼神以元徽二年於上清宮昇舉

見舊通志

王靈輿初居五老峯夜夢神人謂之曰得道者當得
福地靈墟爾往居朱陵之上峯紫蓋之嶙岫可以冲
天矣遂遷居南嶽中宮以天監十二年七月昇舉

見

舊通志

鄧郁列仙傳隱居衡山三十餘載魏夫人乘雲而至

謂郁曰君有仙分故來相訪天監十四年忽見二青鳥如鶴大張翼鳴舞移晷方歇郁謂弟子曰青鳥既來期會至矣乃乘青鳥而去

慧思祖燈衡州南嶽慧思禪師武津李氏子依慧聞受法放身倚壁忽悟法華三昧北齊天寶中領徒南邁後止光州大蘇山

唐俞靈瓚列仙傳河間人入衡山修道南嶽赤君授以回風術元和中郴州官吏見其談說異之即曰我

偶然爾非有所知也尋入九疑山絕粒仙去

聶師道列仙傳歙縣人少學道得服松脂法詣南嶽
招仙觀聞蔡道人去不遠乃辟穀七日獨往遇老父
問所從來因折草與之師道咀之味甘自是精健每
入山虎豹見之皆馴伏號問政先生

雙襲祖常居南嶽求度世之術刻意誦黃庭玉篇因
作黃庭觀

王十八衡山人劉晏好道術耳有十八名及刺史嶺

南道過衡山攜十八往嶺中晏歸朝十八出藥三丸
與之遂巡起晏再拜挽留不可但曰藥一丸可延十
歲晏拜相領鹽鐵坐貶忠州已三十年矣一日十八
復至以鹽入水令飲晏吐出前藥三丸晏有姪在側
攫而吞之十八熟視曰汝有道氣吾固知為汝所掠
也遂去

蕭弓手耒陽人役於茶陵領符往鄉督賦宿逋稅者
家聞間壁鷺作人語云明日主人將烹我餉蕭弓手

蕭之作佛作人在我生死間耳蕭異之明旦主人將
宰鷺蕭索其鷺歸隱山中相與說法久之與鷺俱飛
去

王錫桂陽人為郡衙校遇異人得醫術郡大疫以藥
施之全活甚衆咸通間甘露降於居側遂仙去世號
為露僊

何尊師不知何許人龍朔中居衡嶽行步如風常往
來蒼梧五嶺間百餘年狀貌不改或問其氏族但云

何時人因號曰何尊師每杖藜入林有羣虎隨之

上見舊通志

率子廉蘇軾率子廉傳衡山農夫也愚樸不遜衆謂之率牛晚隸南嶽觀為道士觀西南七里有紫虛閣即魏夫人壇也道士以荒寂不肯居者惟子廉樂之端然而已莫見其所為然頗嗜酒往往醉卧山林間雖風雨至不知虎狼過其前亦莫害也侍郎王公祐守長沙奉詔禱南嶽訪魏夫人壇子廉方醉不能起

直眎公曰村道士愛酒不能常得得輒徑醉官人怒之公察其異載與俱歸居月餘落漠無所言復送還山曰尊師韜光內映老夫所不測也當以詩奉贈既而忘之一日晝寢夢子廉來索詩乃作二絕句書版置閣上衆道士驚曰率牛何以得此太平興國五年有南臺寺僧守澄自京師還見子廉南薰門外神氣清逸守澄問何故出山笑曰閒遊耳寄書與山中人澄歸乃知其死驗其書則死日也發其塚杖履而已

懷讓指月錄南嶽懷讓禪師詣曹溪見六祖悟緣既
得法往衡嶽居般若寺入室弟子有六曰汝等同證
吾身各契其一一人得吾眉善威儀一人得吾眼善
顧盼一人得吾耳善聽理一人得吾鼻善知氣一人
得吾舌善譚說一人得吾心善古今

希遷指月錄南嶽石頭希遷禪師夢與六祖同乘一
龜游泳深池覺曰吾與祖同乘靈智遊性海矣天寶
初至衡山南寺寺之東有石狀如臺乃結菴其上時

號石頭和尚南嶽鬼神多顯跡聽法皆與授戒

懶殘祖燈天寶初執役衡嶽寺退食收所餘而食以
性懶食殘故號懶殘鄴侯李泌微時在寺讀書察其
所為不凡一夕潛往道名瞻拜師撥牛糞火中出一
芋以半授泌捧食再拜謝師曰慎勿多言領取十
年宰相刺史將祭嶽祠方修磴道一夜風雷大作隕
巨石橫卧當道修磴者駕十牛以百夫助輓毫不可
動師笑曰無煩多力遂履其石石盤旋疾下聲若震

雷路得開人神之寺門外虎豹羣至師語衆曰為爾
盡驅衆以筭授師纔出一虎遽負師去師與虎豹俱
不知所之

住括天慶初至衡山居月餘忽謂衆曰汝頗聞有徐
敬業乎我是也兵敗入大孤山修道今來此吾已證
四果矣預知卒期葬於衡山

慧海為衡山方廣寺開山祖師每誦經時有五白衣
長人坐聽詢其姓名答曰此山龍王也願獻寺基一

夕擁沙為平地遂建刹

以上舊通志

宋大慧杲指月錄徑山大慧杲禪祖侍郎張九成嘗
曰某每聞徑山老人所舉因緣如千門萬戶不消一
蹋而開或與聯輿接席登高山之上或緩步徐行入
深水之中非出常情之流莫知吾二人落處某此辦
香不敢孤負他也紹興辛酉師毀衣牒屏居衡陽凡
十年

守端指月錄舒州白雲守端禪師衡州葛氏子幼事

翰墨冠依茶陵郁師披削往參楊岐大悟遊廬山圓
通訥以院事讓師示衆若端的得一回汗出來也向
一莖草上便現瓊樓玉殿若未得端的一回汗出縱
有玉殿瓊樓卻被一莖草蓋卻且道作麼生汗出良
久云自有一雙窮相手不曾容易舞三臺

明何以潤桂陽州人宣德六年過武昌遇一少年問
曰君桂陽人知南門外有呂先生否為寄一書尋覓
遍無呂姓者啓書視之皆硃書龍鳳篆始知所遇者

呂仙也自是辟穀食菘豆十七年人號菘豆公正統
中羣鳥集於庭相迎而去

見舊通志

廖孔說列朝詩傳字傳生衡州人從父宦陪京遂為
應天諸生博學強記為詩不經意輕儻自喜漉囊策
蹇日游谿山間山僧道流無不相識問以京洛貴人
都不記也每入城過酒人及好事家酣飲賦詩不數
日輒厭去居山中不數日又復來以此為常海昌許
同生棄官隱華陽招孔說偕隱常往依焉晚年戒酒

持律臨終持佛號而絕後人或見之於茅山柏枝左右以為尸解云

瑞光住衡嶽崩芳峯下稱豆兒佛

見舊通志

皇清賀獻嘉禾人號賀禪師順治間示寂至今肉身現存道焜號大辯桂陽州人初業儒將婚逸去落髮終南山歷參耆宿得法博山以戒律為先築室於衡陽之濠山徒衆千餘焜擬效遠公蓮漏一日入定至西方見像寤即以錫製不差銖黍晝夜兀坐

一龕脇不親席者三十年侍者旁睨之頂際時有光焉

淨訥號且拙安仁王氏子初參巾紫峯無學次參弁山瑞白於百丈瑞印以法偈卓錫常寧大義山刻有法華楞嚴方等諸經註原宗辨謬

行一順治間行脚至耒陽竈頭市有妖假司命為崇常附人語吉凶事書精靈二字於突人爭神之行一以杖擊竈碎之喝曰精從何來靈從何去妖

遂息後築室於桂陽治南地多虎乃為虎說戒虎

曳尾去

以上舊通志

增長菴字異目南昌人靈隱和尚法孫巡撫周召南
請居上封寺高潔變幻工於詞翰侍郎王澤弘給
事車萬育暨諸名流俱樂與之酬唱所著有語錄
上封寺志詩文若干卷

永州府

唐虞何侯列仙傳堯時隱蒼梧山慕長生舜南巡狩

止何侯家夏禹時五帝以藥一器與何侯使投酒中
一家三百餘口飲不竭以餘酒灑屋宇拔宅上昇位
為太極僊人

漢屈處靜列仙傳祁陽人楚白公之後幼而悟道絕
迹人表凡十二年一旦駕鶴而去

張正禮陶隱居真誥正禮以漢末在九疑山中服黃
精顏色壯麗如少年時

晉萼綠華列仙傳羅郁號萼綠華九疑山得道女也

梁簡文帝時降黃門郎羊權家贈權詩及火浣布金玉縑脫各一時已九百歲

何僊姑明一統志零陵人幼遇異人與桃食之遂不饑能逆知人禍福宋類苑云潭州夏鈞過永州問何曰世多言呂先生今安在何笑曰今日在潭州興化寺設齋鈞到潭日取寺中齋歷視之其日有華州回客設供

魯妙典列仙傳九疑山女冠也遇麓林道士授大洞

黃庭經入九疑山十年白日昇天

宋蔣暉初陽烏符觀道士好修煉紹定己丑中秋有黃服異人過訪題壁而去後書無上宮主訪蔣暉見壁上墨跡淋漓知呂仙也追尋之亦飄然長往莫知所之呂仙筆跡今刻石上

何大士道州人幼讀書及冠欲往九疑山學道中途忽聞人呼回顧無人但見所踏石上有如觀音像頓悟持戒益堅淳祐中趺坐而化

坐化佛道州人姓何闕名初於聖母嶺修煉得道歸
辭妻子坐化今肉身尚存

蔣大士江華人性孝友持齋誦經豁然頓悟遂棄家
說法後升姹巖趺坐而化

明秀峯零陵人生正德間築菴於黃溪之陽明山脩
行數十年得曹溪正傳

以上舊通志

火化僧三楚文獻錄不知何許人嘗持瓢攜杖遊衡
永九疑間艷冶愛絲竹飲啖兼人每行吟市上兩

腋如風舉寓寺荒顏甚老衲數輩茹藿不飽而僧即
隨例就食若澹素性成者手持金剛經一卷誦日夜
不休絕不與人語雖問弗對忽有僧深目大鼻面黑
繁鬚跡踉蹌衣藍縷自稱從西方來接引去

寶慶府

秦盧生侯生列仙傳秦始皇遣盧生入海求神仙藥
不得盧與侯生謀隱入邵陵雲山今山有侯仙跡盧
仙影秦人古道煉丹井飛昇臺掃壇竹皆其遺跡

晉文斤列仙傳南昌人號超然子咸安中為邵州高平令遇異人授以丹訣遂棄官康寧二年仙去

唐李震號洞明先生修煉高霞山白晝冲舉

見舊通

志

隱山指月錄潭州龍山和尚洞山密師伯行脚見溪流菜葉洞曰深山無人莫有道人居否乃撥草溪行忽見師羸形異貌洞曰和尚得何道理便住此山師曰我見兩個泥牛鬪入海直至於今絕消息洞山禮

拜問如何是主中賓曰青山覆白雲如何是賓中主
曰長年不出戶曰賓主相去幾何曰長江水上波曰
賓主相見有何言說曰清風拂白月洞山辭退乃述
偈曰三間茅屋從來住一道神光萬境開莫把是非
來辯我浮生穿鑿不相關又曰一池荷葉衣無盡滿
地松花食有餘剛被世人知住處又移茅屋入深居
因燒菴不知所如故稱隱山和尚

崇哲祖燈開福崇哲禪師邵州劉氏子上堂拈偈云

體堂堂觸處彰快須回首便承當
今朝對衆全分付莫道儂家有覆藏

盧慧修煉望雲山肉身猶存石洞中生氣凜然

見舊

通志

曇清祖燈寶慶府光孝曇清禪師上堂有解脫法語
洪覺指月錄瑞州清涼洪覺範禪師一日頓脫所疑
述偈曰靈雲一見不再見紅白枝枝不著花耐耐釣
魚船上客卻來平地捩魚蝦按舊志師過邵州歷武

岡新化故載此

應悅祖燈寶慶府丞熙禪師上堂法語有云現成公
案已多端那堪更涉他門戶

元楊道圓楊氏女夙佩道法三謁太和山夜禮斗於
北辰觀時郡守有子兩手拳合醫不能療道圓以果
與之其手即開後仙去

明冷謙嘉興人曉音律多幻術洪武初為協律郎後
遊湖湘常寓居郡北開元觀因名冷道觀

顓愚名觀霸州趙氏子初依清涼山空印澄法席遍
參諸方得心印於曹溪慧山清萬厯間杖錫遊邵建
五臺菴居之闡法二十餘年所著有紫竹林集金剛

四依解

以上舊通志

皇清慧山名智海為天童五峯禪師法孫由瀉山至邵
即龍山古功德寺創建禪林揚法其中皈依者衆

見舊通志

古梅名定邵陽人初為諸生出家得法於慧山法

語詩文皆有妙諦住為山數十年後演法紫竹林
參學者雲集

岳州府

南北朝陸法和北史陸法和傳不知何許人侯景遣
將任約擊梁湘東王法和乃詣湘東乞征約召諸蠻
弟子八百人在江津二日便發湘東遣胡僧祐千餘
人與同行法和登艦大笑曰無量兵馬江陵多神祠
人俗恒所祈禱自法和軍出無復一驗人以為神皆

從行故也至赤沙湖與約相對法和乘輕船不介胄
沿流而下去約軍一里乃還謂將士曰明日當破賊
遂縱火船而逆風不便法和執白羽扇麾風風即反
約衆皆見梁軍步於水上於是大潰皆投水約逃竄
不知所之法和曰明日午時當得及期而未得人問
之法和曰吾前於此洲水乾時建一刹語檀越等此
雖為刹實是賊標今何不向標下求賊也如其言果
於水中見約抱刹仰頭纔出鼻禽之

唐呂巖列仙傳字洞賓蒲州人得雲房之道隱顯變
化嘗遊湘潭岳鄂明一統志崑留題岳陽樓詩云朝
遊北海暮蒼梧袖有青蛇膽氣麤三醉岳陽人不識
朗吟飛過洞庭湖宋時嘗來謁滕宗諒自稱華州回
道士宗諒密令畫工傳其像口占以贈之曰華州回
道士來到岳陽城別我遊何處秋空一劍橫回憮然
大笑而別

杜蘭香墉城仙錄岳州有漁父於湘江洞庭之岸聞

兒啼聲四顧無人惟三歲女子在側漁父憐而舉之
十餘歲天姿奇偉容貌姝瑩殆天人也忽有青童自
空而下集其家攜女去女謂漁父曰我仙女杜蘭香
也有過謫人間會期有限今去矣其後降於包山張
碩家授以舉形飛仙之術碩仙去漁父亦學道不食
後不知所之

樊夫人上虞令劉綱妻綱素有道術樊亦潛修密證
皆白日仙去唐貞元中湘潭有一媪策杖曳履可數

百里一日語人曰吾欲往洞庭救百餘人湘潭人張
珙具舟檝送之將至洞庭前一日有大風濤撼一巨
舟觸君山島舟既破百餘人並出島上無舟來救明
日有物如城白如雪將過島島上人惶怖叫號岳陽
人亦遙觀駭愕莫能曉也媪舟至島遂飛劍刺之有
聲如霹靂城遂壞乃一白鼉長千餘尺蜿蜒而斃劍
立其胸俄有道士來見媪甚相慰悅珙詰問媪何人
道士曰劉綱仙公之妻樊夫人也

見雋通志

湘中老人博異志賈客呂筠卿春夜泊舟君山命酒
吹笛忽見一老人挈舟來於懷袖間出笛三管筠卿
請吹之老父曰其大者諸天之樂不可發其次對洞
庭諸仙合樂而吹其小者試為子吹之不知可終一
曲否言畢抽笛吹三聲湖上風動波濤滉瀆魚龜跳
噴五聲六聲君山鳥獸叫噪月色昏昧舟人大恐老
父遂止乃歌曰湘中老人讀黃老手援紫藟坐碧草
春至不知湘水深日暮忘卻巴陵道遂棹舟去隱隱

漸沒於波間

江叟列仙傳善吹笛槐上有神教往荆山求鮑仙叟如其言得遇鮑仙贈以玉笛吹之龍來迎去成水仙周生逸其名廬於君山時以道術濟吳楚後將抵洛途次廣陵舍佛寺有三四客來方中秋霽月澄瑩有說開元時遊月宮事周生笑曰某能挈月致之懷袖因命虛一堂翳四垣不使有纖隙且告客曰我將梯取月去聞呼可來觀乃閉戶久之忽見天地曠晦俄

聞生呼曰某至矣客因開其室生曰月在某衣中耳
舉其衣出月寸許一堂盡明寒入肌骨客拜謝曰願
收其光因開戶其外尚昏晦食頃方如初

見舊通志

湘中蛟宮姊湘水記垂拱中太學鄭生曉行渡洛橋
見一女蒙袖曰我孤養於兄嫂惡常苦今欲赴水留
哀於此生遂同載與居號曰汜人數歲生遊長安一
夕謂生曰我湘中蛟宮姊也謫而從君茲滿無以久
留欲為訣耳相持泣別去越十年生之兄為岳州刺

史上已日生從兄登岳陽樓張晏樂酣生愁思吟之
日情無限兮湯湯懷佳期兮屬三湘聲未終有畫艫
浮漾而來中綵樓高百尺其上施帷帳欄櫳有一人
起舞含顰淒怨形類汜人歌曰沂清風兮江之隅拖
湘波兮裊綠裾荷拳拳兮情未舒匪同歸兮將焉如
舞畢歛袖翔然凝望須臾風波遂迷所在

任自信嘉州人曾住湖南常持金剛經潔白無點嘗
汎舟洞庭湖中有異物如雲冒舟上俄頃而散舟中

失自信不知所在久之凌波而出云至龍宮謁龍王
四五人升殿念經與珠寶數十事二僧相送出宮一
僧曰憑付小信至衡州觀音臺紹正師付之云是汝
和尚送來令傳金剛經至南嶽訪僧果見云和尚示
寂幾五六年矣

見舊通志

明巖元元華容人為文昌宮道士與邑人王某從張
三丰遊數載無所獲擬辭去三丰餞之痛飲醉臥嘔
吐滿地二人不及辭明早入揖三丰曰汝果棄吾耶

餽吾唾道在是矣王某不肯餽元元餽之遂悟三丰術能運掌心雷嘗以雷神隨後客至亦呼雷行茶其書存石首民家嘉靖中詔取數冊去

寶方住臨湘至源寺有夙慧博通經典神宗召入禁中賜衣鉢幡幢大藏經晚與素宏道遊甚敬禮之

上舊通志

普實明一統志夔府人幼不茹葷九歲遇僧話即如宿契遂出俗從通禪師居天寧寺攜錫遍歷禪席嘆

曰不超三界非丈夫也自此節食毀形謁石鍾賢禪
師隱楊板山習定一紀出遊衡嶽憇圓通寺升座說
法天花飛墜白鶴翔空長沙大旱迎師祈之說偈而
往大雨隨至一日告門人曰辛未歲正月朔日吾當
去及期端坐而化

常德府

漢黃敬葛洪神仙傳字伯嚴武陵人少讀誦經書仕
州為部從事後棄世學道於霍山八十餘年復入中

嶽專行服氣斷穀為吞吐之事胎息內視召六甲玉
女吞陰陽符又思赤星在洞房前轉大如火周身至
二百歲轉還少壯道士王紫陽數往見之求要言敬
告紫陽曰吾不脩服藥之道但守自然蓋地僊耳何
足詰問聞新野陰君神丹昇天之法此正大道之極
也予可從之紫陽固請不止敬告紫陽曰大闕之中
有輔星想而見之翕習成赤童在焉指朱庭指而搖
之煉身形審能守之可長生紫陽受之得長生之道

也

唐黃洞源列僊傳武陵人大厯中學道於桃源宮瞿
柏庭至武陵師事之尋遇一老僧遂辭洞源曰歸仙
洞去洞源留之不可期十八年再見後洞源之茅山
柏庭忽至計之正十八年洞源曰吾亦將蹈滄海次
日果羽化

藥山指月錄藥山惟儼禪師絳州韓氏子年十七出
家納戒衡嶽博通經論嚴持戒律住藥山海衆四集

久不升座一日院主白云大衆久思示誨日打鐘着
纔集定便下座歸方丈院主隨問為甚麼一言不措
曰經有經師律有律師爭怪得老僧朗州刺史李翱
躬謁問如何是道師以手指上下曰會麼曰不會師
曰雲在青天水在瓶李述偈曰煉得身形似鶴形千
株松下兩函經我來問道無餘話雲在青天水在瓶
師夜登山經行忽雲開見月大嘯一聲應澧陽東九
十里許李贈詩曰選得幽居愜野情終年無送亦無

迎有時直上孤峯頂月下披雲嘯一聲

宋張虛白廣輿記舉進士不第辟穀遊武陵崔婆嘗
飲以醇酒後虛白仙去郡人余安遇於揚州因寄崔
婆詩曰武陵溪畔崔婆酒天上應無地下有南來道
士飲一斗醉卧白雲深洞口

宣鑑祖燈常德府德山宣鑑禪師周氏子常講金剛
般若時號周金剛住澧陽避難浮邱山石室大初中
武陵太守崇德山號古德禪院堅請居之宗風大闡

辰州府

隋瞿夫人列仙傳豫章人兄為辰州刺史有黃元仙者自豫章來刺史高其行以夫人妻之復薦其才德以自代元仙尋棄官與夫人隱於州西之羅山負甚夫人為人傭織以養其姑如此者十年一日忽謂元仙曰昨有帝命當與汝別矣俄化為青氣數丈騰空而去

唐張果修煉大酉山有煉丹池在見舊通志按唐書

張果傳無煉丹大酉事

瞿柏庭列仙傳辰溪人幼聰慧稱為瞿童入武陵師事黃洞源已而得道又云幼時因戲躍入井中後自大酉華妙洞中出依善卷祠脩道功成越桃源宮仙去刺史溫造刻石紀其事

宋陳崇政沅陵人脩道辰溪大酉洞能致雷雨

見舊

通志

元火德姓陳沅陵人落髮為僧以五千四十八步陟

安陽山修道白日飛去當時卓錫處成泉遇旱禱雨

立應

見舊通志

明鍾萬五辰溪羽士有僧過門見萬五園中鋤菜足

離地尺許僧曰此子仙道已成上帝久令署北極驅

邪院

見舊通志

直隸澧州

唐黃明遠睦州人居澧州龍潭寺善誦度人經每晚

有一叟來聽明遠俟經畢問名姓輒不見一日叟跪

告曰吾橫山潺水洞白龍也有過見謫上帝藉託宅
西小池一年矣旦夕荷君經功今得解脫復歸故洞
明年當大旱有符篆一道以酬君德言訖去明年果
旱明遠設壇祀禱持符篆往洞取水歸得大雨是夕
夢叟謂曰今歲天旱上帝勅閉江河溪洞吾昨於官
陂堰取水以應君求勿再瀆也覺視堰果涸

見舊通

志

明鐵笛仙三楚文獻錄隆慶己巳入澧往來市上操

鐵笛長三尺負一瓢夜宿永興寺與宋海翁一瓢道人同遊澧蘭以詩唱和海翁詩工既行於世鐵笛詩有鐵笛醉來吟夜月不知身在羲皇時之句不異作者一瓢道人畫龍亦署紙尾有青蛇藏寶劍鐵笛弄秋風之句傳者誤以為一人

張君不知何許人石門縣桃花洞硃砂橋有壇相傳為張君修煉飛昇之所

見舊通志

荀氏石門陳文鏊妻嘉靖中偕母拾菜觀園山遇老

媪食以野草荀氏吞之自是不饑日惟飲水啖果遂
於山頭結菴棲止不火食者殆三十年鄉人呼仙娘
見舊通志

直隸郴州

漢蘇耽葛洪神仙傳蘇仙公桂陽人文帝時得道早
喪怙以仁孝聞家貧為牛郎牛徘徊側近不驅自歸
母食無鮓往市買便縣去百二十里遽至母驚駭方
知其神異常乘一鹿持一竹杖人謂蘓生竹杖固是

龍也後數歲天西北隅紫氣氤氳有數十白鶴飛翔降於門仙公跪白母曰某當仙違色養明年疾疫庭中井水簷邊橘樹可以代養井水一升橘葉一枚可療一人兼封一櫃晉之有所闕乏扣櫃言之所須當至慎勿開也言畢跣躡聳身入雲紫雲捧足羣鶴翺翔而去來年果有疫母療之以水及橘葉無不愈者有所闕乏扣櫃即至三年後母開之見雙白鶴飛去自後扣之無復有應母年百餘歲無疾終後有白鶴

來止郡樓人或挾彈彈之鶴以爪攫樓板似漆書云
三百甲子一來歸吾是蘓君彈何為

唐廖師列仙傳郴州人懿宗召入行道術有驗後乞
歸山

劉瞻列仙傳小字宜哥家貧好道無巾但總角其兄
瞻曰神仙遐遠難求廊廟咫尺易致瞻不聽忽一道
士至其門曰能相師乎瞻曰幸甚隨入羅浮山四十
年兄登第拜相後被謫至潮臺泊舟瞻冒雨來見瞻

驚喜不勝瞻顏色如童瞻已皤然衰朽始謂瞻曰尚可脩否瞻曰仙凡殊途矣叙闊終夕忽失所在

唐居士列仙傳郴州人闕其名字土人咸謂已百歲有楊隱之者頗好道因謁之乃留隱之宿及夜呼其女曰可將一下弦月子來其女遂帖於壁如片紙唐起祝曰今夕有客可賜光明言訖一室朗若張燭

智儼明一統志郴之右姓曹氏子在孕不嗜葷成童不嗜戲生九年為僧抱經筍入岫巖從名師執業曹

王臯帥湖南請為人師登壇三十八載

全正即無量壽佛程水鄉人周姓幼出家參徑山道
欽禪師之羅浮遊全州擇湘山勝地修建淨土後結
菴湘西覆釜山號無量主人大中復還淨土

靜覺六祖高弟亦稱七祖面壁靜坐六祖謂曰汝不
結人緣他日縱然成佛必定冷淡今俗呼為冷淡佛
曹天師名桂傳程水鄉人幼好道術遇異人授以符
籙遂通仙術歸鄉里屢有應驗里人神之號天師

以

上僑通志

直隸靖州

明無意俗姓賀修道於後山知未來事詔至京師賜
金鉢銀杖號無意祖師遺有經文可禦火災

王宸靖州指揮好道術百歲通慧化之日玉柱垂膝
黃竹修道於綏寧龍烟坡有道行白日飛昇遺有黃

石碑 以上僑通志

方伎 附

長沙府

宋洪蘊宋史列傳本姓藍長沙人年十二詣開福寺沙門智巴求出家習方伎之書以醫術知名太祖召見賜號廣利大師尤工診切每先歲時言人生死無不應

元張康元史列傳康字汝安湘潭人早孤力學旁通術數隱衡山至元間世祖召至上都親試所學大驗授著作佐郎凡召對禮遇殊厚遷秘書監丞卒

衡州府

元曾世榮衡陽人號盲溪精於方脉著活幼心書行世大德丙午市廛火延世榮宅忽焱塵中聞人喧呼曾世榮家併力進水煙止風收得不焚云

見舊通志

明松楊道人不知何許人萬厯初雲遊至桂陽與樵牧雜處一日遇雨衣服沾濕道人跣坐氣蒸如炊不移刻而衣燥衆異而問之道人曰吾體有正火非薪火所及也問能療人疾乎曰吾療人疾即取藥於臟

腑非金石草木之比也有咯血者延之往視道人命以舌舐紅紙視之曰脾未絕可療也扶起坐以已華池水日飲之病者神氣漸復一日聞鄰有哭聲問之則某已屬纊道人至榻前以手摩其支體曰可活以湯灌之稍甦再按之旬日漸能步武後竟授徒十數人皆為名醫

見舊通志

永州府

唐韓偉遠三洞珠囊九疑山人韓偉遠昔師事中岳

宋德元服靈飛六甲得道能遠行

寶慶府

明喻化鵬豐城人以醫遊邵陽治病如臨大敵稍不
中肯憂形於色靜夜深思晨起不櫛沐赴病家處方
畀藥不望報不吝重直人予之金即以市奇方祕論
雅尚氣節能文詞所著有醫經翼醫餘詩草

見舊通

志

劉興漢邵陽人工星術士大夫多與之遊然其言必

本於修德造命嘗識某於貧賤時後官清要未嘗有
所干請及敗株累而興漢獨脫然

見舊通志

岳州府

明李蓬頭臨湘人少遇異人受道術能預言人休咎

見舊通志

常德府

明三休明闕士琦三客傳三休往來之破衲道人也
嘗居桃源縣靈巖僧室攤書夜讀不然燈燭手持一

珠照行間字光達戶外僧伺之時或不見形惟龍首
峻嶒在几案間雲露滿室叩之徐笑曰草為螢鷹為
鳩人獨不化耶不斷酒出懷中杯三爵而罷亦稱詩
間有逸句相人應舉及卜貴賤天壽如響

雲石闕士琦三客傳字他山不入城市襍被書笈往
來山谷間性嗜酒善琴尤精醫術有長桑君之驗

辰州府

明徐仲宇不知何許人善針砭治奇疾人號太素先

生

李六名沅陵人善風鑑以氣色定人吉凶每談言微

中

王二辰溪人性嗜酒日向士大夫家索飲醉中言未

來事頗驗

卜夢龍芷水人善地理為人卜葬不受謝

以上四人

見舊通志

直隸澧州


明醉叟三楚文獻錄不知何許人遊荆澧間日乞醉
不穀食惟啖蜈蚣蜘蛛癩蝦蟆及一切蟲蟻之類或
問諸味孰佳叟曰蝎味最上惜南中不可得蜈蚣次
之蜘蛛小者勝獨蟻不可多食多食則悶人有侮之
者叟漫作數語多中其陰事其人駭而反走公安袁
伯修昆仲偕客出遊道值叟客言某年曾登金山叟
笑曰得非某叅戎置酒某幕客相從乎客大驚詰其
故不答

直隸郴州

唐學成全禪師之弟人有祈嗣者許男即男許女即

女

見舊通志



湖廣通志卷七十五